

東

華

錄

東華錄

順治十三

臣王廷選敬編

臣周潤蕃恭校

秋七月戊午朔攝政王多爾袞率師啟行○己未增江南省城管倉庫官一鳳陽府管倉司官一○開江西鼓鑄○增江南鹽城營遊擊一○辛酉戶部議覆江甯巡撫土國寶奏華亭縣義米一項始於義士顧正心憫里人差役之苦宗族贈養之難捐貲置田四萬八百餘畝每歲租米四萬三千餘石幫貼賠累優恤貧窮原與有司無涉應仍歸正心子孫收種以成義舉從之○甲子命護軍統領敦拜統兵勦河間土寇○乙丑命親王滿達海郡王瓦克達統師征朔州甯武○丁卯免河南開封等府水災額賦○戊辰命朱喇喀石圖率兵勦霸州土寇○湖廣巡撫遲日益奏黃岡土賊

平○贈陝西陣亡參將周建勳官○辛未攝政王多爾袞至阿魯席巴爾臺罷大同之行獵而還分兵與護軍統領索洪署護軍統領希爾良統領往益親王滿達海軍○歸化城土默特部古祿格來貢○壬申命護軍統領伊爾德統兵剿保定一路土寇○四川巡撫李國英奏剿安綿餘賊擒斬賊將解應甲等下兵部察敘○癸酉命梅勒章京吳喇禪率兵協同通州總兵自天津水路會剿趙北口淀賊○湖廣巡撫遲日益奏剿撫黃州賊眾三百餘皆偽王朱蘊鐸等就擒得旨兵部察敘朱蘊鐸著卽於彼處正法○陝西巡撫黃爾性奏土寇陷岐山縣○贈福建陣亡遊擊王鳳岐官○甲戌陝西巡撫盧傳奏剿平澄城永壽涇州各路土賊獲牛馬器械無算○乙亥署江西提督事劉光弼奏復廣昌縣收撫饒州撫州降將三十餘員○丙子以覺羅郎球爲滿洲固山額眞解尙

書任陳泰爲護軍統領解侍郎任○以董阿賴爲左副都御史○
丁丑以河間土寇竊發命護軍統領沙爾虎達統兵前往會同敦
拜酌量勦撫○戊寅山西巡撫祝世昌奏平陽府盜賊蜂起州邑
相繼失陷蒲州遊擊武韜中軍許世德夏縣知縣劉之屏俱死之
○贈福建陣亡參將路運皞桂顯官○辛巳江南江西河南總督
馬國柱奏江南鳳陽滁州淮安揚州蘇州各屬州縣衛所及河南
磁州羅山縣冰雹傷稼請敕撫按確勘蠲恤得旨著照所奏速行
確勘蠲恤嗣後直省地方如遇災傷該督撫按卽當詳察被災頃
畝分數明確具奏毋得先行泛報○壬午山西巡撫祝世昌奏端
重親王博洛復孝義縣斬賊無算○癸未諭兵部邇來土賊橫行
皆由該地方官怠忽疏玩覺察不早故鄉村不良之徒得以窩藏
勾引間有知情者反懼賊勢不畏國法不肯作速報官遂致盜賊

乘間作亂自今以後文武各官於該管地方務須悉心嚴察舉報
勦捕豫爲消弭之計如仍前怠玩致有盜賊竊發者該地方各官
俱治以重罪其窩藏之家處斬左右鄰知情不舉及十家長不行
舉察者概不姑宥爾部傳諭通知○甲申南贛巡撫劉武元奏廣
東餘孽三路肆逆一長驅渡嶺入犯南安一屯聚烏逕窺伺信豐
一設計夾攻直逼崇義隨分調各營將士奮勇會擊連破木城擒
斬僞軍門劉治國等九人陣獲馬匹器械無算下兵部敘卹○丙
戌陝西巡撫黃爾性奏吳三桂李國翰復延綏鎮城斬賊眾四千
六百餘級○丁亥四川巡撫李國英奏蜀賊孫一鳳糾結土司龔
人龍等勾引番逆謀犯龍安參將王明德等大敗之下兵部察敘
○封鎮國公鞏阿岱爲固山貝子

八月己丑平西王吳三桂固山額真墨爾根侍衛李國翰等統兵

攻勦蒲城宜川安塞清澗等處逆賊斬級數千捷聞下所司議敘
○癸巳攝政王多爾袞還京○陝西總督孟喬芳奏山西逆寇虞
允等稱僞永曆年號陷蒲州及臨晉河津等縣臣同戶部侍郎額
色督軍渡河直趨蒲州殺賊無算遂復其城臨晉河津等縣皆平
又報勦平興安賊渠王國賢等俱下所司議敘○甲午免直隸眞
定順德廣平大名水災額賦○征西大將軍親王滿達海等奏克
復朔州馬邑下部議敘○丁酉達賴喇嘛來貢○定西大將軍端
重親王博洛奏賊眾萬餘圍絳州署梅勒章京羅碩等大破之斬
級二千餘進攻孝義委署副將梁化鳳以火藥入地穴藥發城崩
遂拔之賊眾三千餘犯壽陽令署梅勒章京卦喇特晉等援勦復
大破之斬級千餘又敗賊於平遙遼州榆社等處斬級無算又奏
平陽府所屬已附者十七州縣未附者十州縣汾州府所屬已附

者二州縣未附者八州縣太原府所屬已附者六州縣未附者七州縣茲奉旨令駐防兵畱鎮太原出征大兵平定反叛地方俟馬匹餵養肥壯卽令還京臣等觀其形勢大兵一回恐已附城堡亦將爲賊所有伏候 上裁得旨王所奏甚是和碩親王滿達海所統之兵到汾州時可合兵併力攻取汾州俟彼處奏報到日另旨定奪○給事中姚文然奏北直接壤山東河北一帶盜賊日熾商賈不前耕桑失時兵到則東勦西遁兵撤則勾連復起由地勢接連兩省兵糧各有分疆巡撫無調總兵之事權總鎮亦無越境窮追之勦法若倣江南川湖陝西之例卽將眞保巡撫改爲總督衙門其標兵官吏廨宇公費一毫不煩另措但慎推威望大臣重其事權舉直隸山東及河南懷慶衛輝彰德三府悉歸統轄兩省巡撫總兵悉聽節制則狡賊出沒總督可調遣各鎮兵馬合力會剿

或扼其前或截其後勦有全局賊無遁路事不煩而功甚大從之

○己亥贈殉難甘肅巡撫張文衡西甯道副使林爲造西甯道僉

事張鵬翼紹興府知府張懷會稽縣知縣官撫渙官廕○福建巡

撫周世科貪婪無忌屢用非刑殺人罪在不赦法司請按律凌遲

妻孥家產籍沒入官命斬之沒其妻孥家產○甲辰給事中常若

柱劾奏聞賊僞丞相牛金星從闖爲賊弑君殘民抗拒王師力盡

始逃是王法所不宥伊子銓同父爲賊今冒濫作官據湖北巡撫

王守履奏劾賊私巨萬論罪當死且金星父子罪在萬世誅其人

籍其產實爲古今公義請立正國法以快人心得旨流賊僞官眞

心投誠者多能效力常若柱此奏殊不合理著議處牛銓貪賊實

情著照律擬奏○乙巳以馮杰爲戶部右侍郎由大理寺卿遷趙繼鼎爲

左副都御史由太常寺卿遷○丙午錄固山額眞譚泰克復江西功授一

等精奇尼哈番○定遠大將軍鄭親王濟爾哈朗奏大軍自安陸

府入長沙聞賊渠何騰蛟馬進忠等據湘潭多羅順承郡王勒克

德渾固山額真阿濟格尼堪統八旗前鋒兵並護軍爲前哨臣領

眾軍爲後隊前哨兵先抵湘潭賊出三門迎戰我兵分勦大敗之

生擒騰蛟奪門而入克其城隨令尙書阿哈尼堪固山額真劉之

源等率兵一旅趨寶慶固山額真佟圖賴伊拜等率兵一旅趨衡

州時聞賊渠一隻虎

蔣錄云卽李錦

據辰州臣親領兵渡江趨辰州又聞

賊渠杜永熙部賊據永興臣星夜趨永興前鋒統領席特庫等先

至奪門而入生擒僞總兵尹舉智等十人斬之獲馬七十一匹船

四百艘一隻虎聞風棄辰州遁阿哈尼堪劉之源等聞賊首王進

才馬進忠

蔣錄云卽混十萬

據寶慶乘夜馳往平明抵城賊眾迎戰擊敗

之遂克寶慶破南山坡九營斬僞總兵馬有志胡進玉等七人獲

馬百十有七匹努山等又擊破進才九營於大水阿哈尼堪等擊

破賊首袁宗第二隻虎

蔣錄云卽僞光
山伯劉體純

等十營於紅江師至沅州

令伊爾都齊等分兵一半趨靖州時有賊三千餘人踞山角立寨

梅勒章京金維城等直衝入大敗之靖州賊聞風先遁我兵奮力

追逐獲馬三十四匹固山額真佟圖賴等距衡州三十里遇賊兵千

人屯橋上前鋒兵擊敗之又破僞總兵陶養用寨於石橋門斬養

用破僞伯胡一清七營於城南山僞副將黃姓兵於望公嶺僞總

兵周進唐兵於山峪口僞總兵方姓等兵於山上一清復率賊眾

萬人距廣西全州三十里立六營又擊破之我師遂入全州○丁

未遣禮部啟心郎渥赫等往祭故朝鮮國王李倧賜諡莊穆戶部

啟心郎布丹侍衛撤爾岱充正副使封朝鮮世子李湔爲朝鮮國

王○戊申江西巡撫朱延慶劾江西右布政使張毓太諸貪婪狀

得旨革職下撫按鞫訊○庚戌命定遠大將軍鄭親王濟爾哈朗
班師○辛亥以張存仁爲兵部尙書兼右副都御史總督直隸山
東河南巡撫保定等府提督紫荆等關兼理海防軍務原任浙閩總督○
浙江福建總督陳錦奏江右流寇突入延平攻陷大田尤溪二縣
臣調兵會剿恢復二邑斬賊甚多○壬子命英親王阿濟格貝子
鞏阿岱內大臣鄂齊爾統領將士往大同○癸丑陝西總督孟喬
芳等奏臣等令協領根特副將趙光瑞等領兵自蒲州赴平陽會
剿至甯晉聞賊趨榮河前往剿捕途遇僞帥白璋等領馬步賊六
千餘迎敵根特等奮擊大破之斬賊二千有奇餘賊北遁我軍追
至黃河賊溺死無算斬白璋餘賊逃入孫吉鎮悉斬之遂引兵趨
猗氏行十餘里僞監軍道衛登芳擁賊數千依山爲營以拒我兵
又有僞帥張萬全並賊四千餘我兵奮擊斬萬全回擊登芳斬獲

三千有餘生擒登芳並斬僞副將王國興等三十餘員又令章京杜敏等領兵趨解州遇賊渠邊王張五党自成等擊破之榮河猗氏解州俱復下所司察敘○甲寅陝西總督孟喬芳奏章京杜敏等兵駐解州運城殘孽勾連南山賊圍攻解州官兵出城擊敗之斬賊甚多又根特等由猗氏趨聞喜過侯馬驛遇僞都督郭中傑率賊萬餘迎敵我兵奮擊大敗之追殺三十餘里斬賊八千有奇獲器械馬贏無算下所司察敘

九月丁巳朔命八旗每甲喇增步兵章京一每牛条增步兵五○以山東濟南東昌兗州等府州縣失守降巡撫呂逢春二級調用○戊午平西大將軍英親王阿濟格敬謹親王尼堪等遣學士蘇納海等奏八月二十三日僞總兵楊振威遣其守備劉保來言我等原係良民爲逆寇姜瓖迫脅而反大軍來圍大同卽欲斬逆瓖

歸順奈力有不及故爾遲遲今兵民飢餓死亡殆盡餘兵無幾我等問計於各官裴季中等二十三人等與我合謀約斬姜瓖歸順於是臣等向來人言汝等若斬瓖來歸自當恩養至二十八日果斬姜瓖並其兄琳弟有光首級來獻二十九日大軍入大同城下所司議敘○諭和碩英親王斬獻姜瓖之楊振威等二十三員及家屬並所屬兵六百名俱著畱養仍帶來京其餘從逆之官吏兵民盡行誅之將大同城垣自垛撤去五尺其城樓房舍不得焚毀眾將士圍困大同俱已勞苦蘇納海等至日卽與外藩蒙古兵丁口糧先遣出邊王俟辦理城垣事竣班師還京○以鄂穆布敗山東慶都等處賊兵及追斬叛逆吳班岱等五台吉功封多羅達爾漢卓禮克圖郡王○以蘇尼特部噶爾麻於其兄騰機思等遁回時獨率所部來歸封多羅貝勒○庚申征西大將軍親王滿達海

奏甯武關僞總兵劉偉及道員趙夢龍率副參遊守五十餘員兵五千四百餘人來降靜樂縣甯化所入角所諸寨悉平○壬戌山西巡撫祝世昌奏翼城縣知縣何斯美舉首曲沃縣廢紳李建泰負恩倡亂手書有據已檄各屬嚴緝其原書密送兵部得旨李建泰著嚴緝何斯美著議敘○甲子授投誠僞右副都御史嚴我公仍爲右副都御史招撫沙埕舟山等處招撫使僞開遠侯吳凱爲沙埕侯僞義安伯顧奇勳爲舟山伯僞開平將軍姜君獻爲歸義將軍僞總兵陳德芝爲招撫標下右營總兵雷虎彪爲招撫標下後營總兵楊子龍爲招撫標下前營總兵僞安遠將軍王用升爲懷義將軍僞翼義將軍陳龍爲慕義將軍僞副使呂一成爲沙埕監軍副使高樹勳爲舟山監軍副使俱賜敕印並貂帽蟒袍等物○鄂爾多斯部額林臣布達岱顧祿阿濟格札穆蘇皆舉國來降

封額林臣多羅郡王布達岱子伊廩臣顧祿子色冷固山貝子阿

濟格札穆蘇鎮國公○乙丑調盧震陽爲江西左布政使以耿焞

爲山東左布政使

降誥宣大總督

○以莊應會爲江西右布政使管按察

使事

由湖西道參政遷

○丙寅增攝政王下漢二品鑾儀使一三品冠軍

使四品雲麾使五品治儀正各二整儀尉三○喀爾喀部土謝圖

汗來貢○以夏玉仍爲兵部左侍郎兼左副都御史巡撫山東

原任

巡撫

○以卓羅爲禮部尙書俄羅斯臣爲刑部侍郎

由固山額真遷

○以藍

拜爲禮部侍郎

由梅勒章京遷

○己巳靖南王耿仲明屬下牛彖章京魏

國賢旗鼓劉養正隱匿滿洲家人並鞍匠四人索取時僅獲二人

餘俱爲梅勒章京陳紹宗牛彖章京張起鳳縱令脫逃事聞遣官

齎敕諭定南王孔有德靖南王耿仲明平南王尚可喜曰前聞滿

洲家人多被王等招收而去已令兵部傳旨查明解送今有靖南

王耿仲明所屬旗鼓劉養正牛永章京魏國賢隱匿滿洲鞍匠四人已搜獲其二魏國賢將鞍匠隱匿在家及搜查人到攔阻不容入門隨縱二鞍匠脫逃再審所獲二人云不止我等其放馬之處滿洲家人隱匿者尙多因遣人前往搜查劉養正豫先知覺密遣人至放馬處通知梅勒章京陳紹宗牛永章京張起鳳將所匿逃人盡行驅放及搜查人到止獲九人餘俱未獲其陳紹宗劉養正張起鳳魏國賢等雖有航海來歸之功似此隱匿逃人悖逆殊甚是犯不赦之條矣原遣王等南征以爲歸順有功腹心可寄必然利益國家乃反掠滿洲家人實出意外朝廷及各王府並滿洲家人多被招誘其事甚確諭旨到時王等卽親身嚴查將隱匿逃人盡行查出交與差去官員仍撥兵護送如此庶見王等爲國之誠若漫不查送則此隱匿之事顯係王等知情矣○湖廣右布政使

劉自竝以久病休致○癸酉封固倫額駙祁他特爲多羅郡王○
甲戌戶部議准給事中董篤行請頒刻易知由單將各州縣額徵
起運存留本折分數漕白二糧及京庫本色俱條晰開載通行直
省按戶分給以杜濫派從之○征西大將軍親王滿達海定西大
將軍端重親王博洛等奏克汾州斬僞巡撫姜建勳僞布政使劉
炳業嵐縣永甯州俱平又奏平陽汾州等處賊渠葛仲京等陷孟
城驛張姓二僞總兵犯兩紅旗營雷和尚張五圍絳州劉光裕陷
岳陽縣胡邦秀盤踞老君廟官兵俱擊敗之州縣悉平○乙亥贈
死事海州知州張懋勳官廕州同李士麟官○丁丑更定宣大二
鎮官兵經制○庚辰鄂爾多斯部郡王額林臣等來貢○壬午宴
武進士於兵部賜一甲一名金抱一甲胄帶鞞腰刀弓箭等物其
一二甲銀各十兩三甲銀各八兩著爲例○甲申刑部奏靖南王

下旗鼓劉養正牛条章京張起鳳等兵丁馬四等六人隱匿包衣董得貴牛条下鞍匠王可義家人王三等梅勒章京陳紹宗阿達哈哈番張承勳知情招誘牛条章京魏國賢不容接查使之脫逃得實俱擬斬籍其家得旨兵丁馬四等六名俱正法劉養正張起鳳陳紹宗張承勳投誠有功從寬免死籍其家之半魏國賢亦免死鞭一百

冬十月戊子封多尼爲和碩親王傑書爲多羅郡王貝子拜尹圖屯齊尙善鎮國公岳樂喀爾楚渾宗室杜蘭巴爾楚渾巴思翰祜世布爲多羅貝勒鎮國公錫翰屯齊喀輔國公特爾祜扎喀納薩彌努賽富喇塔蘇布圖宗室強度溫齊佛克齊庫爲山貝子輔國公巴布泰德馬護聶克塞額克親席特庫宗室恭馬爾圖會額馬山俱爲鎮國公二等鎮國將軍恭安爲輔國公○辛卯禁伐

昌平故明陵寢樹木○壬辰京師地震○諭厄魯特部奉事佛法
諾門汗曰本朝於舊好之國初不願加兵若當交好時而樂事干
戈誠不能默然處此今喀爾喀方以信使通好乃遣人誘我蘇尼
特部落騰機思反叛挾之而去及我師追騰機思時土謝圖汗丹
津喇嘛碩雷汗無故出兵兩次拒敵惟天降罰使之敗衄二楚虎
爾又無故侵我巴林殺人掠畜俄木布額爾德尼又無故加兵於
我及聞我出師始還巴爾冰圖又來侵我土默特部落殺其人民
劫馬二千匹此輩每起兵端朕能默然處之耶朕前此遣使爾諾
門汗云我雖老我諸子兵卒尙未老也凡有征伐我當以兵助之
朕非因兵力單微求援於爾有前言故命爾聞之爾若踐前言出
兵相助誓不誤期可以定議報我如不欲出兵亦定議來報○癸
巳賊陷福建興化府署府事福州府推官黎樹聲死之撫按以聞

贈樹聲本省按察使司僉事廕一子入監讀書○于故戶部右侍郎梁雲構右副都御史孫昌齡祭葬○甲午山西巡撫祝世昌奏大兵復鄆城擒斬僞元帥韓昭宣等及從賊千餘人○封勞親爲親王○戊戌宣化總督佟養量奏投誠守備楊登州結連土寇陷山陰縣典史施邦政死之○定侯伯頂帶坐褥之制○己亥以孫塔楊起祥爲戶部侍郎管理鹽法駐揚州府○免山東東平長山等十八州縣五年水災稅糧及江西六年以前明季加增違餉○辛丑命攝政王多爾袞率王貝勒貝子公等征喀爾喀部二楚虎爾 上親送之○漕運總督吳惟華奏獲故明樂陵王朱華琦下所司知之○乙巳陝西總兵官任珍奏僞副將唐仲亨勾連川寇偏近秦境臣率兵敗之於屠油壩連破三穴斬仲亨擒僞王朱常瑛朱由枉僞帥焦賚明僞監軍鄧林春蒙古卜布賴等解赴西安

正法下所司查敘○丙午山西巡撫祝世昌奏大兵復潞安○丁未署延綏總兵官南一魁奏官兵克榆林及東西路二十八營堡陣斬僞總兵官任一員謝汝德等並賊級三千○己酉征西大將軍親王滿達海等奏平遙太谷二縣負固不服遣護軍統領索洪圍平遙時僞知縣劉三元已先率兵民遁去會賊五百人復還城取糧我軍奪門入殲之遣署護軍統領希爾根圖太谷以紅衣礮破其城僞知縣李成沛僞都司吳成器等出城遁我軍遮擊亦殲之又潞安府賊分兵二路一拒沁州一圍遼州遣多羅貝勒拜尹圖護軍統領索洪赴沁州鎮國公韓岱署護軍統領希爾根赴遼州拜尹圖等星夜馳往賊聞風遁隨拔沁州城趨潞安比至賊先遁會僞道胡國鼎復率兵還城我兵圍之賊夜走爲我兵所截俱就戮公韓岱等至遼州僞將率賊兵迎戰我軍大破之屯畱襄垣

榆林杜武鄉等縣俱降○庚戌命征西大將軍親王滿達海輔國公薩弼分兵還京畱郡王瓦克達等勦撫山西

十一月丙辰朔贈死事臨鞏兵備道李絮飛臨洮府同知徐養奇岷州同知杜懋哲蘭州知州趙紳渭源縣知縣李昌官廕○湖廣右布政使張大任以老疾休致○漕運總督吳惟華奏廬州營參將金芝同督標副將王戎等領兵進剿貓兒龍潭四柱江家峯尖嶺等寨賊渠余化龍余君實帥丙等各以寨降○戊午江西巡撫朱延慶奏順治五年江西遭金王二逆之變文武各官俱割辦從逆惟故巡按御史董成學分守湖東道參議成大業新喻縣知縣張雲輦廬陵縣知縣常庚袁州副將尙登第或威脅不屈視死如飴或抗志不辱與城俱殞乞敕部優卹以慰忠魂章下部議○丙寅免陝西岷州雹災額賦○癸酉攝政王軍至喀吞布喇克遣四

子部固山額真布內率侍衛什長阿育錫等往偵回報空戈爾
木布見有敵蹤失實下諸大臣議布內自引錯誤之咎擬解固山
額真任籍牲畜之半侍衛等各革職鞭責王以布內屢立軍功且
既引咎與眾官無涉俱免之○甲戌攝政王自喀吞布勒克旋師
○庚辰予故甘肅巡撫張文衡祭葬○壬午靖南王耿仲明往征
廣東至江西吉安府自盡○癸未江南江西河南總督馬國柱奏
徽州府黃山寨僞總兵王俊張公寨僞總兵汪永高五都源寨僞
副將江溥黃尖寨僞監紀程正邦甯國府大義寨僞副將籍維倫
天目寨僞副將朱國相華陽寨僞遊擊葛惕中等各以寨降

十二月乙酉朔山西巡撫祝世昌奏興縣芮城平陸三縣平○予
陣亡守備張文科蔣國臣千總張爾勳卹銀○戊子定遠大將軍
鄭親王濟爾哈朗等奏廣西賊渠趙廉

案蔣錄云一作焦璉

分三路寇全州

順承郡王勒克德渾等率前鋒統領席特庫等擊敗之獲馬四十餘匹後復來寇臣等率兵往援比至賊已遁聞賊渠曹楨子在道州遂令順承郡王征之賊立柵壘據永安關我軍潛襲席特庫拔其營署護軍統領阿濟賴等斬關而入克之獲馬二十餘匹九月曹楨子復以其黨萬餘寇道州順承郡王等率官兵擊敗之斬賊渠三人生擒一人獲馬六十餘匹臣等率兵至永州賊渠周進唐熊兆藻立五營於大松橋臣等遣署梅勒章京達爾泰等擊敗之時固山額真佟圖賴畱駐衡州尙書阿哈尼堪固山額真劉之源畱駐沅州賊攻長甯縣佟圖賴遣牛彖章京陳天謨等破之於石鼓洞斬僞總兵副將二人賊渠王強等犯沅州阿哈尼堪遣署護軍統領杜爾德等破之於便水斬僞副將三人及賊兵七百餘級獲馬六十餘匹諜聞賊渠二隻虎據烏撒城臣等遣前鋒統領努

山等往剿賊三面逆戰我兵俱擊敗之署護軍參領胡尼雅等相繼奪門遂克其城斬僞副將參遊五人及賊兵千五百餘級獲馬二百餘匹我兵自烏撒城還剿賊於艾考洞比至賊遁我兵追敗之斬僞閣部楊鰲等三人又遣署護軍統領伊爾都齊等大破賊渠何永忠克黎平府永忠潰奔永從縣我兵躡其後賊逆戰大破之永忠攜妻子遁斬僞泗江王並僞將五人賊兵一百六十級獲馬四百餘匹招降僞總兵副將監司十一員○癸丑陝西巡撫黃爾性奏叛首劉登高糾黨聚龍駒寨商雒道張國泰率兵環攻破其巢斬登高及賊兵百餘級餘眾悉散○丁酉甘肅巡撫周文葉奏回擊丁國棟黑承印等盤踞肅城總兵張勇副將馬甯分兵夾攻擒國棟承印斬首五千餘級肅州平○己亥平西王吳三桂固山額真墨爾根侍衛李國翰奏賊渠劉登樓任一貴謝汝德潰奔

榆鎮西協定邊一帶發兵追勦累戰克捷僞將齊進才殺汝德降將官馬永爵射死一貴總兵劉芳名擒斬登樓榆林等處底定隨分官兵渡河攻圍保德府谷又發諭招撫河東附近悉皆納款河保營僞總兵張鳳翼授首偏關僞軍門萬鍊內變自焚下所司察敘○辛丑先是江南巡撫土國寶以兵餉不足請旨增派給事中李化麟奏加派乃明季陋習民窮盜起大亂所由我朝應運首革此弊年來東蕩西除興師百萬未嘗用民間一絲一粒今遽以加派爲言竊恐江南如此他處多事之地紛紛效尤有司奉行不善吏書科派作奸朝廷未受一分之利民間已受十分之累是本朝六年未有之成例實啟民間異日無窮之紛擾流弊恐難言矣卽因防海長慮增兵或不容已然兵有經制餉有部撥未可復議加派負開國以來革弊愛民至意奏下戶部○江西提督總兵官劉

光弼奏逆賊張自盛洪國玉等盤踞湖東臣遣中軍參將陳陞等往擊敗之斬獲無算餘賊奔潰僞總兵董明魁郭承夏等率眾降江右土寇悉平○己酉四川巡撫李國英奏鄰水大竹二縣僻在山陬向爲陳三台甘一爵朱德洪等所據今三台就撫一爵德洪尙爾執迷臣遣官招之一爵陽順陰逆將官任魁署鄰水縣知縣王文采墮計身殞鎮臣盧光祖等率兵往勦鏖戰七晝夜將土填塹直登二逆先後伏誅餘黨悉除鄰大二縣俱入版圖下所司察敘○庚戌浙江巡撫蕭起元奏甯波紹興台州土寇平○辛亥河東巡按梁應龍奏追勦聞喜夏縣賊寇並招降僞總兵康姬廷等兵二千餘名○壬子攝政王多爾袞元妃薨令兩白旗牛录章京以上官員及官員妻皆衣縞素六旗牛录章京以上官員皆去纓

東華錄

順治十四

臣王先謙敬編

臣周瀚蕃恭校

順治七年庚寅正月乙卯朔山西巡撫祝世昌奏章京穆成格等擒斬逆渠翟懸劉定宇等復永甯州甯鄉縣二城○織造龍衣機上有異光三日不止欽天監占以爲皇上統一天下政治文明之瑞云○壬戌南贛巡撫劉武元奏官兵恢復廣東南雄府○乙丑朝鮮來貢國王李淏奏據議政府報云倭子情形可畏去年秋閒鞭撻使臣出言不遜驛館倭使常以密書示通事言辭甚謬我國每年所與糧米前皆運至屯中今堆積驛館似有所待又云伊國叛賊雜入漢商船內出沒沿海地方遣使我國言洋船若漂至卽行執送今有漢人船漂至不送於咫尺倭館直爲解送上國其

蓄憾於我比前必甚前後事端已成閒隙綢繆之計不可不早等語臣竊念小邦自壬丁年之變各處城郭皆壞兵器不整者蓋十有餘年今觀狡倭情形儻遇警急無計奈何惟恃天朝援兵念東萊府距王京無十日之程王京距帝都甚遠當小邦奏請天朝發兵之時有何城郭器械可恃以待援兵今欲修築訓練以爲守禦之備因前有旨禁止不敢專擅伏祈皇上體先皇帝存亡繼絕之仁法古聖人先事豫防之計鑒察本內事情指示勝算使小邦得免殘破之患幸甚○丁卯攝政王以玉寶追封其妃博爾濟錦氏爲敬孝忠恭正宮元妃○癸酉封鄂爾多斯部單達爲貝勒沙克查爲貝子以其舉國投誠也○甲戌浙閩總督陳錦奏僞德化王朱慈葉僞石城王朱議涉糾逆作亂陷大田官兵進剿慈葉議涉俱就擒命斬之○先是平南王尙可喜靖南王耿仲明率

師征粵時隱匿旗人逃人千餘名至是刑部鞠實議創可喜仲明
爵仍各罰銀五千兩所屬阿思哈尼哈番阿達哈哈番牛永章京
陳效忠劉養正張起鳳魏國賢等俱應革職贖罪得旨尚可喜耿
仲明等有航海投誠之功免削爵各罰銀四千兩陳效忠等免革
職分別折贖○丁丑和碩鄭親王濟爾哈朗師旋○攝政王多爾
袞納肅親王豪格福金博爾濟錦氏

二月丁亥上 大行皇太后尊諡曰 孝端正敬仁懿莊敏輔天

協聖文皇后○甲午以劉宏遇爲右副都御史巡撫山西原任安徽巡撫

王一品爲兵部左侍郎兼右副都御史巡撫廣西原任鳳陽巡撫○征西

大將軍郡王瓦克達奏大兵平定潞安平陽澤州僞總兵申亥郭

亥魏閑各率餘黨歸順廢官李建泰據太平我兵圍之二十餘日

勢迫出降命誅建泰併其兄弟子姪黨羽俘其妻室籍其家產入

官○乙未改江甯國子監爲江南府學○乙巳喀爾喀部綽克圖衛徵諾顏等來貢○己酉 孝端文皇后梓宮至盛京祔葬 昭陵○辛亥攝政王傳諭各部事務有不須入奏者付和碩異親王端重親王敬謹親王辦理

三月乙卯以阿喇善爲刑部尙書

由侍郎遷

○以平回賊功加總督陝

西三邊兵部左侍郎孟喬芳爲兵部尙書○以馬之先爲湖廣左

布政使

由按察使遷

○江西巡撫朱延慶奏廬陵縣知縣常庚當金王

二逆叛亂時抗節不從罵賊而死乞賜卹典章下所司○壬戌喀

爾喀部扎薩克圖汗等來貢○予殉難河南河北道塗廓江南海

州知州張懋勳祭葬海州州同李士麟祭○辛未贈甘肅陣亡參

將瞿大有官○癸酉調卓羅爲左都御史阿哈尼堪爲禮部尙書

以明安達禮爲兵部尙書特晉爲兵部侍郎

由理事官遷

○以巴朗爲

左副都御史

由理事官遷

○乙亥鄂齊爾圖台吉來貢○丁丑浙江福

建總督陳錦奏官兵生擒偽新建王朱由模及其黨朱由桷黃繼盛命斬之○己卯征西大將軍謙郡王瓦克達奏官兵平定平陽府屬二十六州縣○庚辰刑部侍郎俄羅斯臣坐獄獄徇情革職○癸未喀爾喀部那穆齊衛徵諾顏等來貢○解刑部尙書阿喇善任罰銀一百兩以攻山西左衛時不將登城人名啟王反行巧飾也○丁亥以綽貝爲總理漕儲戶部右侍郎

由理事官遷

○己丑以

李中樞爲湖廣按察使

由蘄州道副使遷

夏四月甲午定南王孔有德奏大兵抵衡州擒偽軍門鄭思愛於燕子窩敗偽興甯侯胡一青於永州撲巨寇馬進忠於武岡滅偽永國公曹志健於龍虎關擒偽軍門黃順祖偽總兵林國瑞於興甯並招降偽軍門向文明等官兵五萬斬獲無算得旨褒獎有功

人員令所司察敘○丙申晉封貝勒張繼倫爲郡王以其祖有大

功也○改山海關總兵缺爲副將○己亥調覺羅郎球爲刑部尙

書由吏部調濟席哈爲刑部侍郎以星爾爲工部侍郎由理事官遷○辛

丑陝西總督孟喬芳奏甘州回賊乘調兵下川之隙遂作亂戕殺

撫鎮道臣臣督兵馳勦斬米喇印於水泉丁國棟等城破就擒正

法傳示諸城次第俱復報聞○甲辰征西大將軍謙郡王瓦克達

班師

五月癸丑朔改督理淮浙鹽務戶部侍郎孫塔爲總理漕儲戶部

侍郎○甲寅降陝西巡撫黃爾性甘肅巡撫石維崐各二級調用

以大計造冊舛錯也○乙卯貝子鞏阿岱緣事降鎮國公○丙辰

敘追騰機思及平定福建江西湖廣浙江等處功將士升授有差

贈死事者官子弟襲職○戊午攝政王率諸王大臣出獵於山海

關○辛酉以哈世屯爲議政大臣○以祖澤遠爲禮部侍郎吳喇
禪爲刑部侍郎金維城爲兵部侍郎○癸酉攝政王率諸王大臣
親迎朝鮮國送來福金於連山是日成婚○丁丑贈大同殉難遊
擊佟國仕管一舉劉懋德參將李向堯都司謝應舉魯學禮守備
董廷儒官○戊寅贈殉難山西冀甯道副使王昌齡巡南道副使
劉澤溥甯武道僉事金光祥岢嵐道僉事徐滄汾州府知府黃廷
柏潞安府知府楊致祥太原府同知張國賢蒲州知州錢法裕繁
峙縣知縣崔尙質興縣知縣李昌汴臨縣知縣張耀祖垣曲縣知
縣李榮宗夏縣知縣劉之屏官廕忻州州同馬維熙按察使司照
磨楊其籍布政使司都事周邦翰教諭賈道醇主簿何顯祖典史
鄭運昌王自亮鍾夢豹官○庚辰改鳳陽皇陵衛爲鳳陽左衛設
守備一○壬午改九永守備爲永定守備增兵一百名增九谿衛

守備一兵三百名

六月乙酉平西王吳三桂奏保德州民兵崔耀等擒斬僞定國公牛化麟以城降職僞官二百一十七人○己丑攝政王啟於中後所以巽親王滿達海及諸貝勒貝子等行列不整令和碩端重親王博洛等議其罪擬削滿達海爵奪所屬人口一半餘分別降黜攝政王曰滿達海罪大姑念其父免此一次一宥再宥則可屢釋之可乎其諭滿達海知之貝勒屯齊尙善各罰銀千兩貝子扎喀納罰銀六百兩博洛坐知情不舉罰馬一匹將管圍章京孟果爾岱等十一員各射鳴鏑三十道喇等十員各射鳴鏑二十罰銀一百兩○贈山西殉難冀北道副使朱子玉陽和左衛兵備道徐一范通判楊達李三元渾源州知州榮爾奇朔州知州王家珍江西殉難候補知州成大業新喻知縣張雲壘廬陵知縣常庚官廕○

丙申贈湖廣陣亡都司成溥唐銓官廕○癸卯南贛巡撫劉武元
奏官兵擒剿僞軍門彭順慶僞官一百五十七名復甯都石城二
縣○甲辰贈殉難定陶縣知縣李文學官廕○烏斯藏闡化王來
貢

東華錄

順治十五

臣王先謙敬編

臣周瀚蕃恭校

秋七月乙卯攝政王諭京城建都年久地污水鹹春秋冬三季猶可居止至於夏月溽暑難堪但念京城乃歷代都會之地營建匪易不可遷移稽之遼金元會於邊外上都等城爲夏日避暑之地予思若倣前代建造大城恐糜費錢糧重累百姓今擬止建小城一座以便往來避暑庶幾易於成工不至苦民所需錢糧官民人等宜協心併力以襄厥事除每年舊額錢糧外特爲造城新增錢糧加派於直隸山西浙江九省等處地方直隸二十四萬四千二百四十四兩九錢山西三十三萬二千六百一十三兩九錢浙江三十萬六千七百四十五兩四錢山東二十九萬九千六百三十

七兩一錢江南五十九萬五千七百七十四兩九錢河南一十七萬二百八十七兩三錢湖廣九萬九千三百八十八兩三錢江西二十二萬八十二兩八錢陝西二十三萬一千二百二十五兩四錢此項錢糧從見在當差人丁額徵地畝內增派該管督撫司道府州縣官宜協力催徵作速起解此城所用錢糧惟恐苦累百姓損之又損於數縮而不浮凡官吏書役人等若有額外需索罔利作弊者一經查出加以重罪該地方督撫嚴察禁諭此外有官民人等好義急公情願捐助者聽其自便所捐錢糧有能親自解京者任其自解不能親解者可將姓名籍貫並所助錢糧數目詳細開載投送工部其錢糧交該管督撫解送該督撫仍備造捐助姓名籍貫錢糧數目文冊具奏捐助之人酌量恩敘著該部作速傳諭各省一體遵奉施行○以覺羅阿克善爲工部侍郎○裁陝西

漢羌鎮留副將一兵一千名併屬興安鎮○丙辰降原保定巡撫于清廉一級調用以失糾貪穢道臣高登庸也○丁巳索倫部使鹿國來貢○辛酉貝子錫翰與席訥布庫多爾濟達爾漢冷僧機哈世屯等詣攝政王府王怨曰頃子罹此莫大之憂體復不快

上雖人主念此大故亦宜循家人禮一爲臨幸若謂上方幼冲

爾等皆親近大臣也又曰爾等毋以予言擅請臨幸儻駕至爾

等罪益甚矣錫翰等出王遣人追止之甫出門錫翰等已奏請

駕臨幸矣上既至王讓錫翰等曰爾等故違予令不告予擅奏

請駕幸其意豈非以上至即可借以釋爾罪乎言訖向錫翰

等跪且拜頃之駕回王下錫翰等於議政王大臣會議又以巴

圖魯詹達雲驚拜巴圖魯坤巴圖魯巴哈目覩錫翰等罪狀不卽

執鞫因並治罪於是眾議以錫翰等違令擅請駕臨罪大莫比

論死籍其家驚拜亦論死達雲等俱削職籍沒議入會 上將賜食錫翰等以應否前往啟王王以其視 上與己有異厥罪愈甚次日令降貝子錫翰爲鎮國公罰銀二千兩二等精奇尼哈番冷僧機爲一等阿思哈尼哈番贖身一等精奇尼哈番鰲拜巴圖魯爲一等阿思哈尼哈番贖身一等阿達哈哈番兼一拖沙喇哈番哈世屯爲拜他喇布勒哈番贖身席訥布庫多爾濟達爾漢贖身坤巴圖魯巴哈倍罰以應得之罪巴圖魯詹達雲俱免罪○壬戌以馬之先爲右副都御史巡撫陝西由湖廣左布政使遷○辛未免陝西西甯各堡寨五年雹災額賦○丙子裁蘇松提督學政歸併江甯提督御史○戊寅歸化城土默特部古祿格等來貢

八月壬午朔朝鮮來貢○丁亥先是攝政王遣禮部尙書阿哈尼堪往迎朝鮮王弟時阿哈尼堪以有公主喪同啟心郎渥赫啟和

碩異親王滿達海端重親王博洛敬謹親王尼堪以章京恩格德代之且以公主喪事告朝鮮王弟事覺下諸王大臣會勘議降滿達海爵爲公量奪所屬牛条削博洛尼堪爵盡奪所屬牛条各罰銀五千兩阿哈尼堪論死渥赫應鞭一百籍沒家產得旨滿達海罰銀三千兩降博洛尼堪爲郡王各罰銀二千兩革阿哈尼堪職贖身削渥赫一拜他喇布勒哈番○戊子以索洪爲吏部侍郎

軍統

領選○己丑晉封巴林部輔國公額駙塞卜騰爲多羅郡王蒿齊

忒部多羅額爾德尼貝勒孛羅特爲多羅額爾德尼郡王科爾沁國輔國公顧穆爲多羅貝勒喀喇沁部固山貝子古魯思喜布爲多羅都冷貝勒以其舉國來降也○諭禮部承澤王碩塞王勞親已封親王查例和碩親王之下多羅郡王之上並無止稱親王之例著改爲多羅郡王○甲午定福建官兵經制○丁酉贈山東殉

難遊擊杜國慶官○己亥裁湖廣顯陵衛○壬寅以林德馨爲湖

廣左布政使

由山西按察使遷

黃紀爲湖廣右布政使

由陝西按察使遷

張儒秀

爲河南右布政使

由山西管按察使事參議遷

○癸卯戶部奏故明衛所軍丁

有領運之責故屯田徵派較民地稍輕今軍丁旣裁凡無運糧各

衛所屯田地畝俱應查照州縣民田則例一體起科徵解從之○

丙午喀爾喀部土謝圖汗等來貢○贈殉難霍邱縣知縣吳國用

興國縣知縣柴震龍定南縣知縣曹邦偉龍南縣知縣呂應夏官

廕

九月甲寅福建巡撫張學聖奏逆渠鄭成功犯潮州總兵官王邦

倭大破之成功遁入海○丁卯以馬光先爲山西右布政使

由山東按

察使

于時躍爲陝西按察使

由河南河南道副使遷

蕭時彥爲山西按察使

由湖廣下荆南道參政遷

○己巳喀爾喀厄魯特烏斯藏等部巴郎和羅濟達

爾汗囊素盆挫堅挫等來貢○庚午江西巡撫朱延慶卒○丙子免湖廣麻城等六縣五年六年荒地額賦○丁丑厄魯特部干布胡土克圖等來貢○戊寅贈荊州陣亡都司呂養蛟官

冬十月辛巳朔日有食之○庚寅山陽縣高堰清河縣文華壩等處隄成○己亥戶部議覆巡視茶馬御史吳達奏陝西茶引明季係茶馬御史自行印發故引有大小之分又有大引官商平分小引納稅三分入官七分給商之例今引從部發應俱照大引例官商平分以爲中馬之用報可○免直隸霸順義等十六縣六年水災額賦○庚子福建提督楊名高奏官兵進剿邵武逆賊擒僞甯南伯洪國玉僞總兵李安民僞閣部揭重熙命斬之○壬寅喀爾喀部察哈爾墨爾根台吉等來貢○以佟延年爲山東按察使

南右參政遷

徐爲卿爲浙江布政使司參政管右布政事

由河南按察司副使遷

○癸卯裁併大同後衛於前衛高山衛於陽和衛鎮魯衛於天城
衛雲川衛聚落中左所於左衛玉林衛高山城中右所於右衛○
己酉免江南桐城等六縣荒地額賦

十一月辛亥喀爾喀部額爾德尼諾木齊等來朝○王子歸併濟
陽衛羽林前衛燕山前衛於金吾左衛金吾後衛義勇後衛於騰
驤右衛蔚州左衛義勇右衛於彭城衛騰驤左衛富峪衛於神武
左衛府軍前衛武驤左衛忠義右衛於忠義前衛大興左衛府軍
右衛於龍驤衛留守左衛義勇前衛於金吾右衛大甯前衛金吾
前衛於燕山左衛永清右衛濟州衛於永清左衛武驤右衛寬河
衛於燕山右衛○甲寅免陝西甘肅去年被災額賦○山西巡按
蔡應桂奏官兵復永甯州甯鄉縣○乙卯厄魯特部巴圖魯貝勒
等來貢○平西王吳三桂奏官兵復府谷縣斬僞經畧高友才等

及僞官三百餘員兵千餘名擒從逆榆林道孫士甯副將賈梧遊擊李鼎鉉斬之降僞總兵郝自法等下兵部察敘○壬戌攝政王以有疾不樂率諸王貝勒貝子公等及八旗固山額真官兵獵於邊外○甲子贈湖廣麻河陣亡拜他喇布勒哈番董廷伯宗尙勇馬汝弼管牛衆章京事高捷世職○乙丑平南王尙可喜奏官兵克廣東省城斬賊六千餘級溺水死者無算陣擒賊將范承恩等俘獲甚眾肇慶府賊將宋裕昆等率所部降下兵部察敘○丁卯厄魯特部噶木布胡土克圖等來貢○戊辰舟山等處招撫使嚴我公奏僞侯阮進等投誠遣養子阮義入京朝見又逆賊陳龍旣降復叛已遣人行閒縱火焚死下所司知之○壬申上 昭陵寢殿額曰 隆恩殿○癸酉厄魯特部舒虎兒戴青等來貢○先是鄂爾多斯部扎穆蘇殺使臣執信符率其兄弟部落叛至是因不

能謀生復來歸順下諸王議政大臣議以扎穆蘇來歸議免罪盡收其部落令住內地理藩院議扎穆蘇應棄市奪其屬部得旨扎穆蘇既已來歸著免死同來之人仍令管屬其先與門都爾來歸一百九十三戶俱入官

十二月乙酉以魏執中爲河南按察使

由浙江杭嚴道副使遷

○丁亥贈陝

西陣亡遊擊李汝登官○戊子攝政睿親王多爾袞薨於喀喇城年三十九○庚寅以佟國器爲浙江布政使司參政管左布政使

事

由按察司副使遷

○辛卯子殉難靖州總兵官閻芳馨官武岡守備楊

應元金○壬辰攝政王多爾袞訃聞

上震悼詔臣民易服舉喪

○丙申攝政王樞車至 上率諸王貝勒文武百官易縞服出迎

於東直門五里外 上親奠爵大慟各官伏道左舉哀由東直門至玉河橋四品以下各官俱於道旁跪哭至王第公主福金以下

及文武官命婦俱縞服於大門內跪哭是夜諸王貝勒以下及各官俱守喪○庚子命大學士剛林等取攝政王府所有信符收貯內庫又命吏部侍郎索洪等取賞功冊收進大內○乙巳議政大臣會議英親王阿濟格罪既集上命譚泰吳拜羅什傳諭議政王大臣等曰國家政務悉以奏朕朕年尚幼未能周知人之賢否吏刑工三部尚書缺員正藍旗一旗緣事固山額真未補可會推賢能之人來奏諸王議政大臣遇緊要重大事情可卽奏朕其諸細務令理政三王理之譚泰吳拜羅什奏云議推大臣恐不免稍遲上曰遲而得當何傷但速而不得其人是所憂也於是譚泰等傳諭諸王大臣諸王大臣議奏吏刑戶三部事務重大應各設尚書二員吏部擬公韓岱譚泰刑部擬濟席哈陳泰戶部擬巴哈納噶達渾工部擬藍拜調王多尼於正藍旗以公韓岱爲固山額

眞阿爾津爲護軍統領其應奏事務吏部則官員升轉遷除刑部則官員過犯及大辟等罪戶部則錢糧庫物出入其餘一切部務酌量應啟奏者啟奏應諸王辦理者辦理 上是之○丙午湖川總督羅繡錦奏定南王孔有德攻拔桂林府擒斬甚眾粵西道通○是歲行鹽三百三十八萬一百十六引徵課銀一百七十七萬四千五百九十二兩六錢有奇鑄錢十六萬八千二百四十二萬四千五百一十有奇

東華錄

順治十六

臣王先謙敬編

臣周潤蕃恭校

順治八年辛卯春正月己酉朔蒿齊忒部台吉噶爾馬撒望儲護爾率所部來歸○辛亥朝鮮來貢○以布丹爲議政大臣○壬子贈江南陣亡副將王登雲官○甲寅議和碩英親王阿濟格罪先是攝政王薨之夕英王阿濟格赴喪次旋即歸帳是夕諸王五次哭臨王獨不至翌日諸王勸請方至英王於途遇攝政王馬羣廝卒鞭令引避而使己之馬羣廝卒前行第三日遣星訥都沙問吳拜蘇拜博爾惠羅什曰勞親王係我等阿格當以何時來眾對曰意者與諸王偕來或卽來卽返或隔一宿之程來迎自彼至此路途甚遠年幼之人何事先來蓋因其來問之辭不當故漫應以遣

之吳拜蘇拜博爾惠羅什等私相謂曰彼稱勞親王爲我等阿格是以勞親王屬於我等欲令附彼彼旣得我輩必思奪政於是覺其狀增兵固守又英王遣穆哈達召阿爾津僧格阿爾津以自本王薨後三年不詣英王所矣今不可遽往應與攝政王下諸大臣商之於是令穆哈達回遂往告公額克親及吳拜蘇拜博爾惠羅什額克親等謂阿爾津曰爾勿怒且往我等試觀其意何如英王復趣召阿爾津僧格乃往英王問曰不令多尼阿格詣我家攝政王曾有定議否阿爾津等對曰有之將阿格所屬人員置之一所恐反生嫌故分隸兩旗正欲令相和協也攝政王在時旣不令之來今我輩可私來乎此來亦曾告之諸大臣者英王問曰諸大臣爲誰阿爾津僧格對曰我等之上有兩固山額眞兩議政大臣兩護軍統領一切事務或啟攝政王裁決或卽與伊等議行英王曰

前者無端謂我憎多尼多爾博我何爲憎之我曾拔劍自誓爾時
吳拜蘇拜博爾惠羅什等遂往告之自此動輒恨我不知有何過
誤旣又曰退讓者乃克保其業被欺者反能守其家又言曩征喀
爾喀時兩日風大作每祭福金皆遇惡風且將勞親取去見居正
白旗爾等何爲不來意欲離間我父子耶阿爾津僧格對曰似此
大言何爲向我等言之王雖以大言抑勒我等豈肯罔顧殺戮而
故違攝政王定議乎英王曰何人殺爾阿爾津僧格曰儻違攝政
王定議諸大臣白之諸王能無殺乎於是英王大怒呼公傳勒赫
屬下明安圖曰兩旗之人戈戟森列爾王在後何爲可速來一戰
而死阿爾津僧格起欲行英王復令坐曰不意爾如此爾等係議
政大臣可識之異日我有言欲令爾等作證阿爾津僧格對曰我
等有何異說兩旗大臣如何議論我等卽如其議語畢還具告額

克親吳拜蘇拜博爾惠羅什於是額克親吳拜蘇拜博爾惠羅什
阿爾津議曰彼得多尼王卽欲得我兩旗旣得我兩旗必強勒諸
王從彼諸王旣從必思奪政諸王得毋誤謂我等以英王爲攝政
王親兄因而嚮彼耶夫攝政王擁立之 君今固在也我等當抱
王幼子依 皇上以爲生遂急以此意告之諸王鄭親王及親王
滿達海曰爾兩旗向屬英王英王豈非誤國之人爾等係定國輔
主之大臣豈可嚮彼今我等旣覺其如此情形卽當固結謹密
而行彼旣居心若此且又將生事變矣迨薄暮設奠時吳拜蘇拜
博爾惠羅什欲共議攝政王祭奠事英王以多尼王不至隨於攝
政王帳前繫馬處乘馬策鞭而去端重王獨留卽以此事白之端
重王端重王曰爾等防之回家後再議又攝政王喪之次日英王
曾謂鄭親王曰前征喀爾喀時狂風兩日軍士及廝養逃者甚多

福金薨逝時每祭必遇惡風守皇城柵欄門役竟不著下衣又言攝政王曾向伊言撫養多爾博子甚悔之且取勞親入正白旗王知之乎鄭親王答曰不知又言兩旗大臣甚稱勞親之賢此言乃鄭親王告之額克親吳拜蘇拜博爾惠羅什者又謂端重王曰原令爾等三人理事今何不議一攝政之人又遣穆哈達至端重王處言曾遣人至親王滿達海所王已從我言今爾應爲國政可速議之此言乃端重王告之吳拜蘇拜博爾惠羅什者至石門之日鄭親王見英王佩有小刀謂吳拜蘇拜博爾惠羅什等曰英王有佩刀上來迎喪似此舉動叵測不可不防是日勞親王率人役約四百名將至英王在後見之重張旗纛分爲兩隊前並喪車而行及攝政王喪車既停勞親王居右坐英王居左坐其舉動甚悖亂於是額克親吳拜蘇拜博爾惠羅什阿爾津集四旗大臣盡發

其事諸王遂撥派兵役監英王至京又於初八日英王知攝政王病劇乃於初九日早遣人往娶萬丹之女以上情罪諸王固山額眞議政大臣會鞠俱實議英王阿濟格應幽禁籍原屬十三牛彖歸上其前所取叔王七牛彖撥屬親王多尼投充漢人出爲民其家役量給使用餘人及牲畜俱入官勞親王先欲迎喪令阿思哈白於敬謹王順承王二王弗許後英王欲謀亂密遣人召勞親王多率兵來令勿白諸王勞親王遂不白諸王擅率兵前往應革王爵降爲貝子奪攝政王所給四牛彖席特庫身爲前鋒統領聞攝政王喪不白之諸王乃服蟒桂佩新刀預伊王亂謀調兵前往應斬籍其家毛墨爾根曾犯大罪免死禁其於英王處行走每遇出兵輒稱疾不行今預王亂謀率兵前往應斬籍其家穆哈達以家奴因預王一切亂謀授爲二等護衛今復預謀奪政大罪聽其

役使應斬籍其家馬席言萬丹有女以誘伊王明知攝政王病劇令往取其女遂率蚌蘇同往罪一及薩袞都校問王曾奉旨與否馬席明知無旨詭辭巧答云有旨與否我不得知罪二馬席應斬籍其家同行之蚌蘇應鞭一百郎球身爲固山額眞明知勞親王欲去時曾爲敬謹王順承王所止且英王遣人召勞親王令勿白諸王多率兵來之言阿思哈曾告之郎球郎球令阿思哈告王所屬章京二人前往又知勞親王行收其鎖鑰欺隱不告諸王後經阿思哈供證鑿鑿乃巧供不知應置重典但念其不在王倡亂之列應革職解固山額眞尙書任爲民籍其家產之半阿思哈身爲長史王欲去時令往告敬謹王順承王王等止之阿思哈所知也英王謀遣人來召勞親王令勿告諸王多率兵來阿思哈遂不告諸王擅同勞親王率兵前往應革職解長史任鞭一百爲民籍家

產三分之一願爾布習於攝政王薨之夕並不舉哀勸英親王竟去從此永不至喪次勞親王率兵來時與其王同行預英王亂謀應革職爲民奪其先給一牛衆之人令各歸其主所給姨母福金之家產及投充漢人俱入官莫洛渾薩爾布海當王謀亂時聽從王密遣召勞親王多率兵往應各鞭一百星訥身爲尙書都沙身爲長史本王作亂雖不與謀但王包藏禍心欲召勞親王遣二人往白內大臣二人遂親往又明知密召勞親王多率兵往不行舉發星訥應解尙書任都沙應解議政大臣及長史任奏入上從之○乙卯以蘇克薩哈詹岱爲議政大臣○丙辰戶部進陝西漢中府額貢柑子諭曰陝西進貢柑子雖屬歲額但地方官員採辦不無苦累小民之處且漢中去京甚遠沿途動用人夫轉送更累驛遞是以口腹之微而騷擾吾民也朕心殊爲不忍目前陝西需

餉正殷著留此買運柑子錢糧以養兵民爾部卽傳諭該督撫嗣後漢中額貢柑子著永行停止以昭朕體恤百姓至意其江南所進橘子河南所進石榴亦著永行停止○戊午諭戶部各處織造所以供朝廷服御賞賚之用勢不可廢但江甯蘇州杭州三處織造已有專設官員管理又差滿洲官並烏林人役催督不但往來糜費錢糧抑且騷擾驛遞朕心深爲不忍嗣後著停止差催止令專管官員照發去式樣敬謹織造解京應用陝西亦織造戎褐絁蟒朕思陝西用餉甚多本省錢糧不敷每撥別省協濟此織造戎褐絁蟒殊屬無用亦著停止節省冗費以完兵餉旣於國計有益且免沿途驛遞夫役轉送之苦至陝西買辦皮張之處亦屬煩擾著一併停止爾部卽行傳諭以昭朕恤兵愛民至意○命議政諸王固山額眞大臣會議睿親王子多爾博承襲事議以俸祿護衛

名數及諸用物視親王三倍其原護衛百名裁四十名諸用物有同御用者俱裁革得旨朕之初心本欲於攝政王歸政之後優禮酬報不意王中道捐棄未遂朕懷今多爾博特加恩禮豈可與眾爲比王等議是但將護衛裁去四十名朕殊不忍著仍留八十員○設宣府柳溝永甯二路都司各一○己未戶部尙書覺羅巴哈納等入奏事畢上問曰外間錢糧有無益之費否巴哈納等奏曰有京師營建用臨清甄土質堅細遣官一員燒造分派漕船裝載抵通又由五閘撥運至京給與腳價上曰營造宮殿京師燒甄儘可應用若臨清燒造苦累小民又費錢糧撥運甚屬無益況漕船載運漕糧遠涉波濤已稱極苦再令裝載帶運益增苦累朕心甚爲不忍臨清燒造城甄著永行停止原差官撤回○庚申上親政御太和殿諸王羣臣上表行慶賀禮是日頒詔大赦天

下詔曰朕今躬親大政總理萬幾 天地 祖宗付託甚重海內

臣庶望治方殷自維涼德夙夜祗懼天下至大政務至繁非朕躬所能獨理凡我諸王貝勒等及中外文武大臣其各殫忠盡職潔己愛人任怨任勞不得推諉天下利弊必以上聞朝廷恩意期於下究庶政舉民安早臻平治凡我民人宜仰體朕心務本興行樂業安生共享太平之慶○以宜巴漢爲刑部侍郎力克圖爲禮部侍郎俱由梅勒章京遷○定南王孔有德奏攻克廣西省城底定桂平二

府擒斬僞靖江王並僞世子將軍中尉閣部總兵文武等官四百七十三員招撫二百四十七員獲馬贏器物無算下所司察敘○壬戌江西進額造龍碗得旨朕方思節用與民休息燒造龍碗自江西解京動用人夫苦累驛遞造此何益以後永行停止○甲子諭朝鮮國王李滉曰詳覽王奏內云前日察問時邊臣等失措於

嚴威之下不能從實備對臣卽將盧協嚴加刑訊遠配邊地李晏亦施流竄之律等語夫李晏盧協之罪或虛或實宜奏請定奪王乃聽奸臣之言徑自問結此王大誤也李景輿係亂國之臣先皇帝有旨不許任用今王違前旨復用此又王之大誤也屢次乖誤事雖屬王實皆亂國奸臣李景輿李景輿趙炯撥置之罪此輩所犯重大本不可恕茲逢慶赦姑免其罪永不許用李晏盧協無罪著復其原職王屢次乖誤之罪亦皆原有自今以後當益加敬謹恪守禮義竭盡忠誠亂國起釁奸臣之言切不可聽○進二等伯吳拜爲三等侯二等精奇尼哈番蘇拜爲一等精奇尼哈番又一拖沙喇哈番二等阿思哈尼哈番羅什爲一等精奇尼哈番一等阿思哈尼哈番又一拖沙喇哈番阿爾津爲二等精奇尼哈番二等阿思哈尼哈番博爾惠爲二等精奇尼哈番以舉首英王亂

政事故也○乙丑 上初聘科爾沁圖卓禮克圖親王吳克善女

爲后至是卓禮克圖親王親送至京和碩親王滿達海等請於二

月內舉行 大婚禮 上以大婚吉禮此時未可遽議所奏不准

行○丙寅以夏一鶚爲右副都御史巡撫江西由技察使遷○丁卯升

祔 孝端文皇后於 太廟○移內三院署於紫禁城○戊辰封

鎮國公鞏阿岱錫翰俱爲固山貝子○己巳免直隸安州芝棉稅

糧○以公伊圖爲議政大臣○辛未諭禮部擬上 皇太后尊號

○壬申贈湖廣陣亡遊擊王所寵官○敘征福建湖廣功將士升

授有差○丙子諭禮部 皇考麟趾宮大貴妃衍慶宮淑妃敬事

先皇恭勤素著雍和肅穆譽洽宮闈宜各晉徽稱以表令德今

尊大貴妃曰 皇考懿靖大貴妃淑妃曰 皇考康惠淑妃應行

禮儀爾部開列具奏○敘征大同功將士升授有差○丁丑封多

羅端重郡王博洛敬謹郡王尼堪俱爲和碩親王○以鞏阿岱贅拜巴圖魯巴哈爲議政大臣○戊寅以巴圖魯詹杜爾瑪爲議政大臣

二月庚辰封親王滿達海爲和碩異親王多尼爲和碩信親王郡王羅可鐸爲多羅平郡王瓦克達爲多羅謙郡王傑書爲多羅康郡王○更定錢制每錢百文準銀一錢違者論罪○辛巳免山西朔州渾源大同荒地稅糧○癸未初羅什博爾惠額克親吳拜蘇拜等五人出獵歸越數日謂兩黃旗大臣曰攝政王原有復理事端重王敬謹王親王之意時兩黃旗大臣卽察見其言動不順又端重王謂兩黃旗大臣云羅什敬我過於往日彼曾召隋孫言攝政王有復以端重王爲親王之意已告知兩黃旗大臣矣又穆爾泰往視博爾惠病時博爾惠言攝政王原有復理事兩王爲親王

之意我等曾告於兩黃旗大臣今兩王已爲親王否於是穆爾泰歸語額爾德赫額爾德赫云此言關係甚大爾旣聞之可告之王穆爾泰懼未以告而額爾德赫告於敬謹王王因遇有頒詔事黎明至朝會處遂以告端重王旣入朝房又以告鄭親王其時端重王同兩黃旗相會云此爲我輩造釁耳可訴之鄭親王敬謹王云博爾惠所語穆爾泰之言予先曾告知端重王入朝房後又以告知鄭親王矣於是二王及兩黃旗大臣跪訴於鄭親王兩黃旗大臣言羅什博爾惠額克親吳拜蘇拜等皆有是言來告我等旣又私謂二王皆我等兩黃旗大臣遲延其事耳夫二王乃理事王也若非二王發伊等之奸豈不令二王與我等爲仇而伊等得以市其諂媚乎又前撥正藍旗隸 皇上時業已以何洛會爲滿洲固山額眞侍衛顧納代爲護軍統領阿喇善爲蒙古固山額眞攝政

王言予既攝政側目於予者甚多兩黃旗大臣侍衛等人皆信實予出外欲賴其力以爲予衛俟歸政然後隸於上其時曾致一書於貝勒拜尹圖一書於譚泰此諸王及朝中大臣所共知也又將無用之巴爾達齊撥於黃旗而不與正藍旗此豈羅什博爾惠等所不知乎羅什自恃御前大臣陰行蠱惑爲欺罔唆搆之行以多尼王歸正藍旗給多爾博阿格兩旗而分爲三旗其意將奈誰何今照此分給是皇上止有一旗而多爾博反有兩旗矣於是鄭親王以下尙書以上公鞠之以羅什博爾惠動搖國事蠱惑人心欺罔唆搆罪狀俱實應論死籍其家額克親從直供吐且原非奸佞巧辯之人應除宗室爲民籍其產一半全奪所屬人役吳拜蘇拜應令爲民其家產照披甲人例撥給餘俱入官議上得旨朕每聞刑人殊爲不忍羅什博爾惠罪本應誅姑宥其死何如諸

王大臣其再議之於是眾復奏言此搖動國是蠱惑人心欺罔唆
搆之人天發其奸不可復留乃如議行○戊子上 昭聖慈壽皇

太后尊號冊寶○己丑頒恩赦○諭征甘州功將士升授有差○

以任濟爲戶部右侍郎

原任

○贈殉難延綏巡撫王正志河東運使

鄭宏圖運同李因之鹽運司知事王存鑒官○免山東汶上等五

縣六年七年水災額賦○辛卯諭戶部邊外築城避暑甚屬無用

且加派錢糧民尤苦累此工程著卽停止其因築城加派錢糧朕

本欲將已徵者發還百姓未徵者卽行停徵但恐奸汙官吏並催

錢糧人等不體朕意欺罔小民將已徵者竟入私囊未徵者仍行

催比著姑照原派徵完查照完過數目開除八年正額錢糧如地

方官將已完錢糧不入正數許赴該督撫處告理督撫據實奏參

從重治罪如督撫不爲行查卽來京赴部告理其各官吏士庶捐

助銀兩已解未解及既經奉旨者俱著照數查收該部將姓名記冊酌量議敘嗣後捐助俱免○癸巳蘇克薩哈詹岱穆濟倫首告睿王薨於出獵之所侍女吳爾庫尼將殉葬時呼羅什博爾惠蘇拜詹岱穆濟倫五人屬之曰王曾不令人知備有八補黃袍大東珠數珠黑貂褂今可潛置棺內及回家殯殮時羅什蘇克薩哈詹岱穆濟倫將八補黃袍大東珠數珠黑貂褂潛置棺內又王欲於永平府園房偕兩旗移駐與何洛會羅什博爾惠吳拜蘇拜等密謀定議將園房之人已經遣出會因出獵稽遲未往等語事聞

上命諸大臣質訊時固山額真尙書譚泰亦首言睿王取肅王妃並令肅王諸子至第較射時何洛會詈之曰見此鬼魅不覺心悸蘇克薩哈告睿王王曰想彼欲媚我而爲是言但我之愛彼更自有在貝子錫翰亦首言何洛會向我言 上今親政兩黃旗大臣

與我相惡我昔曾首告肅王今伊等豈肯不殺我而反容我耶於是併案會訊俱實以睿王令伊等用服飾等件又欲率兩旗駐永平陰謀篡逆睿王應籍沒所屬家產人口入官其養子多爾博女東莪俱給信王何洛會前首告肅王非肅王有抗上之罪也肅王以睿王攝政心懷篡逆不能隱忍發言何洛會黨附睿王乃以首告彼時卽應正法今復言皇上親政兩黃旗大臣與我相惡必挾仇殺我罪一以惡言加肅王諸子罪一睿王欲另駐永平時同與密謀罪一何洛會應凌遲處死籍其家胡錫知其兄何洛會種種逆謀不行舉首應凌遲處死籍其家蘇拜知睿王棺內置黃袍黑貂褂東珠數珠徇隱不首罪一睿王欲另駐永平時同與密謀罪一蘇拜應斬因先犯死罪會蒙聖恩寬宥仍應免死得旨依議○甲午免山西荒地稅糧○丙申給事中姚文然奏巡按察

吏安民其任綦重向議暫停爲不得其人故也臣謂巡按之失人總因都察院堂官之溺職耳夫巡按出有差規入則考覈整肅憲綱全在堂官今都察院滿漢憲臣八九員御史等近六十員半年以上來不聞奏請甄別皇上親政之始不聞請旨特遣俾賢者憤悶無以自立不肖者覲顏有以自容堂官愈多憲綱愈壞故臣謂欲巡按之得人宜自激清都察院諸臣始也事下廷議○厄魯特部台吉額爾德尼等來貢○丁酉諭戶部國家首重體統尊卑原有定分近聞滿洲撥什庫及莊頭投充人等不守法度罔顧尊卑騎馬直入府州縣衙門與府州縣官並坐藐視命吏任意橫行目中既無官府何況小民其欺陵魚肉不問可知深可痛恨爾部卽出示嚴行禁止並行文各府州縣如有撥什庫人等仍前無故擅入官府衙門及陵侮官員欺害小民者卽擒拏解部從重治罪○

戊戌封貝勒岳樂爲多羅安郡王○己亥追論睿王多爾袞罪狀
詔示中外詔曰鄭親王端重親王敬謹親王異親王同內大臣等
合詞奏言 太宗文皇帝龍馭上賓諸王貝勒大臣等同心翊戴
共矢忠誠扶立 皇上彼時臣等並無欲立攝政王多爾袞之議
惟伊弟豫郡王多鐸唆調勸進 皇上因在沖年曾將朝政付伊
與鄭親王共理逮後睿王多爾袞專威權不令鄭親王預政遂
以伊親弟豫郡王多鐸爲輔政叔王背誓肆行妄自尊大以 皇
上繼位盡爲己功又將 太宗文皇帝昔年恩養諸王大臣官兵
人等爲我 皇上捐軀竭力攻城破敵勦滅賊寇之功全歸於己
其所用儀仗音樂及衛從之人俱僭擬至尊蓋造府第亦與宮闕
無異府庫之財任意糜費擅用織造段匹庫貯銀兩珍寶不可勝
計又將 皇上侍臣伊爾登陳泰一族及所屬牛彘人丁剛林巴

爾達齊二族盡收入自己旗下擅自誑稱 太宗文皇帝之卽位

原係奪立以挾制中外又構陷威逼使肅親王不得其死遂納其

妃且將官兵戶口財產等項不行歸公俱以肥己又欲 皇上侍

臣額爾克戴青歸己差吳拜羅什剛林祁充格封以爲侯爵因戴

青不從復罷侯爵又差羅什以美言誘 皇上侍臣席訥布庫翼

其黨附凡一切政事及批票本章不奉 上命概稱詔旨擅作威

福任意黜陟凡伊喜悅之人不應官者濫升不合伊者濫降以致

僭妄悖理之處不可枚舉又不令諸王貝勒貝子公等入朝辦事

竟以朝廷自居令其日候府前昨伊之近侍額克親吳拜蘇拜羅

什博爾惠口稱亡主遺言欲亂國政被端重親王敬謹親王暨內

大臣等公同出首遂將羅什博爾惠正法額克親吳拜蘇拜從重

治罪訖以此思之多爾袞顯有悖逆之心臣等從前俱畏威吞聲

不敢出言是以此等情形未曾入告今謹冒死奏聞伏願 皇上
速加乾斷列其罪狀宣示中外並將臣等重加處分等語朕隨命
在朝大臣詳細會議眾論僉同謂宜追治多爾袞罪而伊屬下蘇
克薩哈詹岱穆濟倫又首伊主在日私製帝服藏匿御用珠寶曾
向何洛會吳拜蘇拜羅什博爾惠密議欲帶伊兩旗移駐永平府
又首言何洛會曾遇肅親王諸子肆行罵詈朕聞之卽令諸王大
臣詳鞠皆實除將何洛會正法外多爾袞逆謀果眞神人共憤謹
告 天地 太廟 社稷將伊母子並妻所得封典悉行追奪布
告天下咸使聞知○庚子調韓岱爲刑部尙書陳泰爲吏部尙書
○辛丑 上幸南苑○壬寅移定南王孔有德駐廣西桂林府○
癸卯 上還宮○乙巳封和碩肅親王豪格子富壽爲和碩顯親
王增註其父軍功於冊曰定濟甯州等處時用火攻開滿家等十

洞殺賊甚多招撫從賊三縣所屬人民又招撫睢州總兵許定國官兵萬餘統大軍征四川時攻克三寨山張閣老崖等處山寨三座盡招撫其餘所屬寨堡擊敗水陸馬步敵兵二十二次追殺八次又破八大王張獻忠一百三十六營遂誅獻忠又誅僞王及僞總兵大小官共二千三百員招降文武僞官二百三十五員馬步兵丁六千九百九十餘名遂定四川睿王心懷篡逆爾無故被害朕親政之後不勝追痛富壽爾係朕親兄之子推恩封爾爲和碩顯親王○遇必隆希爾良希福祖澤潤雅賴納穆海噶達渾敦拜覺善馬喇希法喀訴其革職解牛彖任及籍沒家產悉屬冤枉部議俱復職及牛彖任各還家產從之○丙午諭戶部諸臣曰田野小民全賴地上養生朕聞各處圈占民地以備畋獵放鷹往來下營之所夫畋獵原爲講習武事古人不廢然恐妨民事必於農隙

今乃奪其耕耨之區斷其衣食之路民生何以得遂朕心大爲不忍爾部作速行文地方官將原園地土盡數退還原主令其乘時耕種

閏二月戊申朔川湖總督羅繡錦奏續順公沈永忠遣總兵官張國柱同護軍統領馬進功率官屬兵丁追剿湖南賊寇賊首牛萬才率僞總兵以下官八十餘員兵五千七百餘名齎繳僞敕印投誠○己酉贈殉難甘肅總兵官劉良玉副將潘雲騰毛鎮官○封和碩鄭親王濟爾哈朗子富爾敦爲世子濟度爲多羅簡郡王勒度爲多羅敏郡王○壬子以公圖賴子回色無辜奪爵復爲一等公○晉譚泰爲一等公○楊善羅碩俄莫克圖夏塞伊成格許爲何洛會誣許無辜坐罪部議各還原職從之○癸丑大學士剛林等奏臣等纂修明史查天啟四年及七年六月實錄並崇禎一朝

事蹟俱缺宜敕內外各官廣示曉諭重懸賞格凡鈔有天啟崇禎實錄或有彙集邸報者多方購求期於必得或有野史外傳集記等書皆可備資纂輯務須廣詢博訪彙送禮部庶事實有據信史可成下所司知之○甲寅諭吏部邇來有司貪污成習皆因總督巡撫不能倡率日甚一日國家綱紀首重廉吏若任意妄爲不思愛養百姓致令失所殊違朕心總督巡撫任大責重全在舉劾得當使有司知所勸懲今所舉者多屬冒濫所劾者以微員塞責大貪大惡每多徇縱何裨民生何補吏治爾部須秉公詳察奏聞如有此等惡習定當從重治罪不貸部院堂官係各司楷模尤當正身潔操砥礪自愛殫心盡職以不負朕惓惓用人求治之意其京堂大小員缺亦著選擇有才望堪用者不得循資挨轉以後內外各官宜洗心滌慮勤守職業不得仍蹈前弊自取罪戾○調党崇

雅爲戶部尙書劉餘祐爲刑部尙書金之俊爲兵部尙書謝啟光

爲工部尙書

由戶部調

○免河南封邱等六縣七年水災額賦○乙卯

諭吏部樞關之設國家藉以通商非以苦商關稅原有定額差一

司官已足何故濫差多人忽而三員忽而二員每官一出必市馬

數十匹招募書吏數十人紹興棍徒謀充書吏爭競鑽營未出都

門先行納賄戶部又填給糧單沿途騷擾鞭打驛官奴使村民惡

迹不可枚舉包攬經紀任意需索量船盤貨假公行私沿河一帶

公然與劫奪無異商賈恐懼不前百物騰貴天下通行河道何以

至此朕灼知今日商民之苦著仍舊每關設官一員其添者悉行

裁去以後不得濫差其裁缺撤回之員既不利於商賈又何利於

州縣之民戶部不得妄咨勤勞吏部不得更與銓補國家愛惜牧

民之官豈得仍前蒙混爾部謹識朕諭實心遵守毋負朕通商愛

民之意○封多羅承澤郡王碩塞爲和碩親王增註軍功於金冊
曰我軍破流賊滅明福王平定河南江南時爾同多羅豫郡王於
潼關破流賊李自成兵二十萬遂入潼關得西安府平定秦地又
定河南克揚州府渡揚子江取江甯府又追蘇尼特部落騰機思
時聞騰機思在懷噶魯台地方爾同多羅豫郡王凡兩夜三日追
及之俘獲騰機思部落及其牲畜喀爾喀部土謝圖汗兵迎戰於
查濟布喇克地方爾率眾列陣大破彼兵次日碩雷汗兵迎戰復
率眾列陣大敗之圍困大同時堅守汛地賊兵有至者輒同眾揮
兵殺敗之又賊眾萬餘入據代州關爾與和碩端重親王樹梯攻
克又得勝路助馬路賊兵七千去我兵三里許立爲兩營爾親督
戰敗之爾原係多羅郡王加恩封爲和碩承澤親王○以一等公
愛星阿祖有大功加三等阿達哈哈番俸三等公褒布自入燕京

未經升敘晉爲一等公廓步校革職在前控告在後准懇其父三等公爵○丙辰諭吏部邇來吏治不肖者刻剝民財營求升轉不顧地方荒殘民生疾苦稍知自愛愛民者因上官舉薦不公不覺操守頓易至於不識文義之人益不勝任文移招詳全憑幕友代筆轉換上下與吏役通行作弊貽害百姓督撫不能糾參大乖法紀著令各督撫官嚴加甄別有德有才兼通文義者著保奏不識文字聽信吏役害民不堪爲民牧者立行參劾不得姑留地方害民如徇情隱蔽不行糾參卽爲溺職事發一併治罪至於銓選之時吏部考試文移告示等項優者選用劣者除名澈清吏治大端在此內外各官著遵諭實力舉行○諭吏部朕臨御以來深悉運糧之苦交兌之處收糧官吏勒捐需索滿其慾壑方爲得濟若稍不遂必多方延挨刁難日久以致河冰凍阻船不能行耽誤運期

所攜有限盤費何以支持一路怨聲沸騰朕思運糧官涉河渡江已不勝勞苦又經收糧官吏多方需索必致濫賣官糧盜賣既多必致虧欠總督倉場奉有專敕曾否巡行清刷節年拖欠多至數百萬石總督曾否奏參倉場徒有其名竟無實政是何情弊收糧需索的係何人拖欠若干經管何人曾否查明具報漕運重務上下通同作弊一至於此著趙京仕一併明白回奏○己未平南王尚可喜奏總兵官許爾顯復肇慶府及羅定州徐成功復高州府○陝西河州宏化顯慶二寺僧但巴查穆蘇諾爾卜查穆蘇等來貢宴賚如例仍敕以後喇嘛不許進貢佛像銅塔及番犬○給事中法若真奏下人犯上實由等威不辨今大小諸臣入朝雖有頂帶分別而燕居衣冠與平民無異吏胥華服過於官長優隸服飾同於公卿非所以別等威也宜分別貴賤以防僭濫兼請復三品

以上大臣肩輿舊制以肅觀瞻下所司議○給事中袁懋功奏江南浙江等處巧立機戶名目舉報富家承充胥役百端苦索民多破產求脫請敕部禁止下所司查議○以軍功升三等侯鰲拜巴圖魯爲一等侯○壬戌以初議英王阿濟格及貝子勞親罪尙輕命諸王大臣再議議移英王原繫之處幽於別室將先給用物酌給外餘俱籍沒貝子勞親降爲庶人酌給家產及牛彘其他物俱籍沒仍將勞親給與和碩巽親王其英王庶出四子在勞親家者給與和碩端重親王從之○甲子偏沅巡撫金廷獻奏湖南幅員遼闊賊黨繁多雖經和碩鄭親王定南王大創之後仍復嘯聚猖獗如僞平遠王李定國僞秦王孫可望平東王劉文秀沐國公及張先璧萬年策等偏近沅州肘腋而曹馬楊何毛郝趙王等各逆又復糾合跳梁蟻聚靖州門戶又有紅頭白頭梅獠諸賊徒逞於

柳桂藍山宜章興甯間所在蠢動雖有續順公駐鎮然地廣兵單未免有顧彼失此之虞伏乞敕部酌議以湖北無事之兵量移湖南有事之地並足經制之額堵防邊界則重地有兵戰守有具封疆有賴矣下兵部議○乙丑諭吏部國家設官圖治必公忠自矢殫力報效方能裨益民生共襄盛治若藉權行私肥己蠹國不知開代紀綱不念民生疾苦此等不肯自愛之人徒取備員毫無實效皆由用人無定衡之故朕自親政以來屢下詔諭嘉與更始近見部院諸臣因仍前弊未能洗滌肺腸託名熟練持祿養交習爲固然其有年居懸車戀戀爵祿豈眞有心報國不過假借朝廷之官爲養身之計朕今令吏部具列各部院堂官職名親行更定與天下見之如馮銓先經御史吳達奏參私得叛逆姜瓖賄賂殊失大臣之體便當引去乃隱忍居官七年以來毫無建白毫無爭執

著令致仕謝啟光七年錢糧全無銷算經糧官交兌費用苦累難支遂致挂欠漕糧三百餘萬石關稅原有定額啟光濫差多人加倍需索不顧商民貧苦至於一差之出不循次序任意徇私穢聲盈耳大玷官箴著革職爲民永不敘用李若琳身任禮臣檢校專擅與馮銓交結親密朋比爲奸至於應用奉詔各官忽取翰林院七員又取六員又改取三員此誠何意有司官例不差遣亦得營求出差冒濫實甚著革職爲民永不敘用左都御史卓羅副都御史羅璧巴朗啟心郎朱拉察不循職掌緘默苟容曠官之罪何辭俱著革任徐起元任風憲之官不能稱職念其守鄖陽來歸有功著調用吏部啟心郎甯古里前此銓選越格濫用匪人以爲迎合之計著革職永不敘用趙京仕年老著回奏後致仕熊奮渭言語不明著致仕戴明說同官貪婪當秉公力爭乃反唯唯聽命歷來

銷算事屬同官者必據爲己有明係希望有司求己銷算其操守不潔可知姑念年力尙壯著降二級調外用自今以後朕所親定留任者著盡心供職不得虛應故事苟且塞責年老致仕者仍著有司相待以禮其調用者須淬礪更新懲改前非以不負朕因才器使之意內外大小臣工亦應各遵明諭自維何等官職便應盡何等事業若仍前上下交欺不求實效法必不貸○丙寅諭兵部國家設立驛遞原以傳朝廷之命令通天下之脈絡年來四方多故兵馬絡繹差遺繁多驛遞疲困至今日已極乃奉差官員全不知地方苦楚勘合火牌之外恣意苦索驛夫不足派及民夫騷動里甲甚而牽連婦女繫累生儒鞭驛官如罪犯辱州縣等奴隸以致夫逃馬倒罷市止耕上誤公務下害小民深可痛恨以後再有此等之人不拘大小衙門著各地方官卽指名申報該督撫飛章

參奏以憑重處其地方官驗明勘合火牌亦卽照數應付毋得稽遲取罪如本無遲誤情弊該差員役因需索不遂駕言遲誤反卸罪州縣者尤爲可惡著該督撫一併查參治罪各衙門亦不得濫差官員多請應付爾部可宣朕旨違者卽著參處○諭兵部朕思各處土寇本皆吾民或爲飢寒所迫或爲貪酷官吏所驅年來屢經撲勦蕩平無期皆因管兵將領縱令所部殺良冒功因而利其婦女貪其財帛眞賊未必勦殺良民先受荼毒朕每痛之嗣後各該督撫所屬境內有賊寇依山伏莽嘯聚焚劫者卽廣偵密探責令領兵官星馳相機勦撫勿令滋蔓其附近賊巢居民不得借按捕爲名一概殺搶至從賊營逃出難民難婦及眞賊革心投順卽與訊明安置完聚不許仍前殺擄如有零星賊黨竄入村落者責成道將有司設法掩捕不得輕動大兵使玉石俱焚儻被人首告

爲賊者該地方官須詳審實情勿聽仇扳株連近聞地方官一經首告未辨真假輒縱差役先行乘機鈔掠甚屬可惡以後若有此等事本官一體連坐各督撫務嚴飭各該道將等官實力遵行稱朕除寇安民至意如地方官仍蹈故轍縱賊害良著該督撫指名參奏治罪如該督撫徇情隱庇經部臣參奏定行一併治罪○吏部列薦原任吏部侍郎熊文舉兵部侍郎李元鼎工部侍郎王永吉僉都御史趙開心才品堪用命起送來京○封鎮國公章泰爲固山貝子○調李率泰爲吏部侍郎以馬光輝爲刑部侍郎○以佟圖賴爲禮部侍郎臧國祚爲工部侍郎○戶部侍郎庫立以病免○丁卯諭禮部舊制紅黃色帶原以分別宗室覺羅今後異姓外藩及額駙等除親賜黃紅色帶許用外和碩親王以下不得以黃帶紅帶給與異姓外藩及額駙人等○廣西巡撫王一品奏定

南王孔有德遣總兵線國安馬蛟麟等進克梧州柳州二府○戊

辰以大學士洪承疇管左都御史事○以陳之遴爲禮部尙書

由吏部左

侍郎張鳳翔爲工部尙書

侍郎遷

○己巳御史匡蘭兆奏朝祭

宜復用袞冕得旨一代自有制度朝廷惟在敬天愛民治安天

下何必在用袞冕○裁江南陝西督餉侍郎淮安總理漕運侍郎

○庚午命固山額真阿喇善等率將士勦山東土賊○辛未厄魯

特部昆都倫吳巴什等來貢○裁四川總兵官二○壬申戶部議

覆科臣李運長奏請免圈良涿等十三州縣餘地以甦民困報可

○乙亥刑部尙書固山額真公韓岱等審議剛林等罪狀議稱剛

林初在盛京曾犯大罪應死蒙皇上恩宥乃不思感激圖報反

依附睿王朝夕獻媚罪一及既附睿王上有旨詰問剛林云爾

爲睿王取去乎抑思往附乎剛林奏言原欲將我撥給原主爲睿

王取去遂爾留用巧言誑上以此詰問剛林據供睿王原令我往順承王處我辭不往遂隨睿王是實罪二又以引誘額爾克戴青一案訊剛林據供係睿王所遣此處有何置辨罪三以擅改國史一案訊剛林據供睿王取閱太祖實錄令削去伊母事遂與范文程祁充格同抹去後白之和碩鄭親王和碩巽親王和碩端重親王和碩敬謹親王未經奏聞擅改實錄隱匿不奏罪四以剛林祁充格二人預睿王逆謀朝夕籌畫定議遷駐永平一案訊之剛林據供不知但剛林祁充格與羅什博爾惠等推崇睿王功德僭擬至尊何事不與謀議尙欲狡詞抵飾罪五又學士馬爾都蔣赫德業成格侍讀鄭庫訥等所言取肅親王福金事前於史檔內未書至二月內補載原處一案訊之剛林據供和碩鄭親王和碩巽親王和碩端重親王和碩敬謹親王謂我等曰睿王在時凡係

所行悖逆未經紀載者可增入故不告知於眾私自增書是實罪
六又將盛京所錄 太宗史冊在在改抹一案訊之剛林據供纂
修之時遇應增者增應減者減刪改是實舊稿尙存罪七又鈔錄
密書罪狀二本剛林取匿不曾繳還一案訊之剛林據供因睿王
欲將罪狀鈔錄伊自看改所寫二本銷毀是實訊鄭庫訥據供鈔
錄罪狀檔冊是實原稿尙存罪八剛林諂附睿王一切密謀逆蹟
皆爲之助應論死籍沒家產妻子爲奴剛林弟常鼎同剛林往隨
睿王潛通往來是實常鼎應革職解部任鞭二百籍其家渥赫亦
同剛林往隨睿王行走但恐必爲彼牽累曾以此言哭懇於固山
額眞公譚泰質之譚泰言渥赫哭訴之言是實渥赫應免死阿爾
三亦同剛林往隨睿王審訊阿爾三據供我因勦土寇隨征往湖
廣歸時已撥白旗家已移住白旗訖隨往護軍統領伊爾德前怨

忿曰緣何如此屢遷今又離爾去矣隨質之伊爾德所言是實阿爾三應免死查布海俟同時另議祁充格曾犯大罪鞭一百永不敘用給與睿王睿王謀逆因超授大學士遂行諂附擅改所修

太祖實錄隱匿睿王罪狀又私自補載及共議推崇功德移駐永平各案無不與剛林同預逆謀祁充格應論死籍沒家產范文程與剛林祁充格同改太宗實錄訊之范文程據供前睿王令改不能爭執然本意原欲啟奏會告之甯完我王文奎後因病而止質之甯完我主文奎此言是實但范文程前既與剛林祁充格同改及後又不自行啟奏託言因病耽閣范文程應革職解任籍其家甯完我身爲大學士王文奎身爲學士既知范文程改實錄事卽應啟奏乃爲隱藏甯完我王文奎俱應革職解任於是具讞白之鄭親王巽親王端重親王敬謹親王順承郡王諸王及滿洲固

山額真內大臣議政大臣會議剛林祁充格二人罪大應斬籍其家范文程應革職本身折贖仍留原任查布海常鼎應革職鞭一百家產籍沒止照披甲人例給與甯完我王文奎無罪應留原任渥赫阿爾三無罪應免議得旨剛林祁充格著卽正法查布海常鼎甯完我王文奎渥赫阿爾三俱如議完結范文程曾效力太宗朝在盛京時又不曾預貝子碩託之罪後知睿王所行悖逆託疾家居眾亦共知睿王取去剛林時以范文程不合其意故不取去范文程著革職本身折贖仍留原任前所行情罪已結今後於委任職掌當矢忠報效其曉諭之○丁丑諭禮部國家生財自有大道僧道納銀給牒瑣屑非體且多有輸納無措逃徙流離殊爲可憫以後僧道永免納銀有請給度牒者該州縣確查呈報司府申呈禮部照例給發○諭兵部朕聞前者青州府故明玉田王之

子聚眾發旗恣行不軌又陝西叛將王元馬德戕殺撫臣議扶慶王之孫招搖惑眾因而故明諸王等多被誅戮朕甚憫焉今朕親理萬幾代天子民務期四海萬姓咸得其所豈故明子姓獨不在涵育之中乎自今以後凡各直省有故明親王郡王流落地方者該督撫察其投誠實情有無功次並將伊家口起送來京分別畜養其自鎮國將軍以下不必起送各照原籍編氓樂業令其一體輸稅當差爾明宗姓亦宜悔禍革心偕遊化日勿犯王章仰體朝廷愛惜生全之意如不信朕言猶懷疑畏惑於奸宄構生事端則國憲具存朕雖欲赦之勿能也○諭都察院朝廷治國安民首在嚴懲貪官欲嚴懲貪官必在審實論罪近見在外督撫巡按參劾有司等官初數贓盈百千及提問報招多作衙役詐害又云贓無入己夫衙役詐害是誰縱容贓無入己初劾何據此皆由司道府

應承問各官受屬受賄督撫又不糾參以致部覆將已革之官仍還原職貪何由懲民何由安今後被劾各官審問涉虛係道府廳開報不實者該部院必查究原開報之官係承問官徇私出脫者必查究原承問之官若督撫巡按不先指名糾參該部院必行舉奏卽以不職論刑部以後覆奏劾疏有罪坐衙役贓無入己或援赦免議皆不得豫擬還職必聽吏部另行覆覈果實應開復吏部方與奏請凡貪婪官員一挂彈章必非完璧或降調閒散或勒令休致皆不得仍還原職從前參問貪官姑照恩赦月日免罪追贓自今頒諭之後大貪官員問罪至應死者遇赦不宥在內該部院在外督撫巡按刊刻告示曉諭各司道府州縣實力遵行○免直隸宛平縣水災額賦○定厄魯特喀爾喀貢使賞例

三月壬午先是搜獲英王藏刀四口刑部不行奏上但告知巽

親王端重親王敬謹親王將刀交 御前包衣昂邦收之 上聞
諭曰阿濟格以罪廢黜猶復私藏兵器既經搜獲部臣何不奏聞
議罪乃違爾完結明係徇庇當治罪事下諸王固山額真議政大
臣於是議巽親王等明知阿濟格藏刀四口事既不奏聞又不議
罪且阿濟納葉思赫在內行走欲用在內婦人三百暗掘地道與
伊子及一切心腹人同謀約於某日某時出獄如此大事不以奏
上將以何事奏 上乎巽親王係承襲父爵應仍留親王罰銀
五千兩降端重親王敬謹親王爲郡王各罰銀五千兩三王俱停
其理事刑部尙書固山額真公韓岱侍郎吳喇禪啟心郎額色黑
旣任部務將此等重大之事止告理事三王不行奏 上復不行
議罪遂爾完結公韓岱應削一世職罰銀一千兩吳喇禪額色黑
應各削一世職贖身英王前犯大罪 皇上從寬免死復加恩養

給與三百婦女役使及僮僕牲畜金銀並一切物件尙以爲不足仍起亂心藏刀四口罪何可貸應裁減一切止給婦女十口及隨身所用衣服其餘人口牲畜金銀並諸物件俱行追取嗣後飯食俱自外傳入降傳勒赫勞親爲庶人照蘇孫阿克塔給與什物將傳勒赫給與承澤親王勞親仍留巽親王處議上得旨依議傳勒赫勞親著查蘇孫阿克塔例給與○癸未 上召戶部尙書巴哈

納等問曰各官俸銀需用幾何應於何月支給大庫所存尙有若干奏曰俸銀支於四月共需六十萬兩今大庫所存僅二十萬兩上曰大庫之銀已爲睿王用盡今當取內庫銀按時速給夫各官所以養贍者賴有俸祿耳若朕雖貧亦復何損○諭吏部朕自親政以來觀天下所以治安者關乎各部院雖自古無參用王之例然聞我 太宗文皇帝曾用諸王於部院朕欲率由舊典復用

諸王念諸王雖甚勞苦然誠各殫厥職釐剔庶務禁絕貪污修整法令俾上下利病不至壅蔽利國家而致昇平莫此爲要今特用和碩巽親王於吏部和碩承澤親王於兵部多羅端重郡王於戶部多羅敬謹郡王於禮部多羅順承郡王於刑部多羅謙郡王於工部多羅貝勒喀爾楚渾於理藩院固山貝子吳達海於都察院諸王等其各副朕圖理治安至意○轉高爾儼爲吏部左侍郎調孫承澤爲吏部右侍郎由兵右調○乙酉諭刑部戶部都察院朕於本月初六日親覽奏章巡撫遲日益爲原參荊州府推官劉祖生招罪內稱祖生病故已服冥誅因思天下之大罪囚之斃於囹圄者不知若干人或死於疾病或死於飢餓或死於刑拷甚至有死於官卒之虐害囚徒之陰謀諸如此類未可悉數朕心爲之惻然是在府州縣良有司濟以醫藥給以口糧非刑有禁陵虐有禁內外

交通毒謀陰害有禁督撫巡按時時申飭該道府親爲清查該州縣有犯前弊者分別參處庶獄囚伏法而死者罪屬應得其餘不至無故而枉死用昭朝廷立法之仁方今時候向熱連日風霾不雨前代常有熱審之例刑部可通察刑獄五城司坊順天府京縣各犯之無干牽連者卽日釋放笞杖徒流次第減免有情罪可矜疑者奏請定奪仰合上天好生之德朕又親覽巡鹽御史崔允宏章奏因思及各處所報鹽課每報餘銀若干細思鹽課正額自應徵解課外餘銀非多取諸商人卽係侵剋百姓大屬弊政戶部都察院通行各鹽差御史及各鹽運司止許徵解額課不許分外勒索餘銀有御史及運司各官貪縱者許商民指赴部院首告審問確實奏請治罪用布朝廷恤商裕民至意該部院各刊刻告示通發京城內外及各督撫巡按徧傳道府州縣鹽運等官實力遵行

○遣官齎敕諭禮物往招達賴喇嘛○偏沅巡撫金廷獻奏湖南保靖永順桑植茅岡大旺喇惹等土司各獻輿圖版冊及元明兩朝印式來歸乞授以原官頒發新印下所司察議○丙戌免直隸武強縣去年被災額賦○己丑以希福爲內弘文院大學士陳泰爲內國史院大學士由吏部尚書遷調李率泰爲內弘文院大學士由內院調甯完我爲內國史院大學士由內院調○調噶達渾爲左都御史以雅賴爲戶部尚書○以珠瑪喇爲吏部尚書譚布爲工部尚書○調車克爲副都御史由戶部侍郎調○以雅泰爲吏部侍郎索爾果屯泰俱爲戶部侍郎覺羅阿克善爲兵部侍郎綽貝羅碩俱爲工部侍郎○增吏刑二部各旗蒙古理事官工部各旗滿洲副理事官各一○辛卯定王公朝集例王以下輔國公以上一月三次大朝集午門內諸王朝房其五日朝期集太和門○壬辰定襲職例凡

世職官員身故以其子襲職無子以親房兄弟襲職○癸巳諭各巡按監察御史曰朝廷遣御史巡方等差原爲察吏安民向來所差御史受賄賂徇屬託身已貪污何能察吏不能察吏何以安民茲新經甄別留差各官豈盡粹白無瑕亦姑用以俟自新自今以後各宜洗心滌慮振作精神如都察院條奏禁約一經點差卽不得見客不收書不用投送書吏員役不交接宴會餞行一出都門毋稽時日沿途及境內私書私餽概不得濫行收受又輪用府州縣快手書吏事竣卽行遣回凡巡按舊書吏承差名缺一概不留不許設中軍聽用等官不許用主文代書不許府州縣運司等官鋪設送迎不許假借公事濫差員役下府州縣不許拏訪不許拔用富豪官吏諸如此類難以枚舉巡方御史果能一遵禁約自然公生明廉生威地方利弊民生疾苦必能上聞大小官吏必能肅

清凡事須設法確訪毋專憑府廳開報毋縱容司道府廳而止參
州縣毋庇護大貪大惡而糾老弱如此則何吏不察何民不安儻
總督巡撫總兵等官有不公不法蒙蔽專擅縱兵害民縱賊害良
等事許巡方御史卽行糾舉若御史有故違前項禁約許總督巡
撫卽行糾舉都察院堂官尤宜督責河南掌道等官時時察訪勿
拘巡方月日不待回道考覈有真心實政先行奏聞特旨褒嘉有
不遵禁約貪肆怠玩先行參劾請撤治罪另差赴代庶不負朕治
安天下至意各差御史將此敕諭入境三日內牒黃刊刻每月司
道發一張每一府州縣各發十張徧示在城在鄉紳士人民等如
不刊刻不徧發經都察院察糾卽著以違旨論諭畢 上復謂大
學士陳泰學士馬爾杜王文奎能圖等曰凡御史出差皆當陛見
對曰誠如 聖諭臣等正欲奏聞 上又諭曰御史爲朕耳目之

司所以察民疾苦及有司之賢不肖也臨差之時必令陛見朕將

地方興利除弊事宜面諭遣之使伊等得親承戒諭始能勤修職

業卿等可傳知都察院令以後遵行○轉任潛爲戶部左侍郎總

督倉場

由戶右轉

以胡世安爲禮部左侍郎

原任

○乙未達賴喇嘛願實

汗來貢○丙申喀爾喀部台吉吳把什厄魯特部阿巴賴等來貢

○復設慶陽鹽課同知裁東路同知香河玉田縣丞陽樊驛驛丞

各一○戊戌贈山東陣亡遊擊吳彩官○癸卯定祭祀齋戒例○

諭戶部滿洲出征陣獲人口各有至親骨肉今旣天下一統誰無

相見之思向因禁止不許歸家探望以致情迫勢急不能自己往

往私自逃歸旣去之後又恐法必不容多有不敢歸者不查則滿

洲苦戰所獲人口豈可任其逃去一經查出收留者又不得不坐

以隱匿之罪朕心大爲不忍爾部傳諭各旗陣獲人口如有願歸

探望親戚者聽本主給限前往如到地方借端生事許地方官依律治罪儻事干重大具詳解部審究其父母兄弟妻子有願投入旗下同歸一處者地方官給文赴部登記於冊准其完聚以示朕滿漢一視之仁○兵部奏向以缺多人少將明季廢官及空加功級未經任事者權宜補用今查有投誠各官效力本朝著有功次應與分別錄用其未經宣勞立功並明季濫加虛級及以贓罪廢棄者相應概不准用從之○丙午吏部奏各旗子弟率多英才可備循良之選但學校未興制科未行先帝在盛京愛育人才開科已有成例今當舉行臣等酌議滿洲蒙古漢軍各旗子弟有通文義者提學御史考試取入順天府學鄉試作文一篇會試作文二篇優者准中式照甲第除授官職則人知向學進取有階報可夏四月丁未朔以鎮國將軍穆臣爲輔國公○戊申定諸王文武

羣臣陪祭扈從及接 駕送 駕儀注○定三大節禮儀○己酉

上御太和殿召見巡按各省御史賜坐諭之曰朕命爾等巡按各省原爲民生計也爾等果能公廉自矢爲朕愛養斯民使得安享太平自當升賞若貪婪害民必行治罪諭畢賜茶遣之○庚戌禮部奏 聖駕出都行幸行在地方官例進御膳等物得旨進獻禮物出自民間有司以此進奉於理不合今後永不許進○遣官祭嶽鎮海瀆 帝王陵寢 先師孔子闕里○南贛巡撫劉武元奏逆賊羅榮犯虔州副將楊遇明斬之○辛亥駐防河間牛彛章京碩爾對以戶部諸臣給餉不均於駐防滄州兩白旗兵丁則給餉不絕於駐防河間兩黃旗兵丁則屢請不發訐告尙書覺羅巴哈納噶達渾雅賴侍郎碩詹王國光車克祝世允啟心郎布丹主事碩色穆臣等下法司鞫問部議巴哈納阿附睿王會撥令隨侍

皇上乃依戀不去又將庫內金銀珠帛等物私送睿王府中又私厚兩白旗兵丁給餉不絕有意刻待兩黃旗兵丁竟不予餉巴哈納應論死籍沒噶達渾雅賴不行奏聞應各削一拖沙喇哈番碩詹王國光車克祝世允布丹碩色穆臣附和巴哈納不行給餉碩詹王國光應革職籍沒家產一半車克布丹應革職籍沒按披甲例量給家產祝世允應革職籍沒家產三分之一碩色應革職鞭一百穆臣應革職鞭五十得旨巴哈納免死仍革職並解尙書固山額眞牛彖任籍沒家產三分之二碩詹應革職並解侍郎梅勒章京牛彖贖身免其籍沒王國光革職並解固山額眞牛彖任贖身免其籍沒車克革職並解梅勒章京牛彖及部任籍沒家產一半布丹革職並解部任籍沒家產一半祝世允革職並解梅勒章京牛彖及部任贖身免其籍沒噶達渾雅賴各罰銀五十兩碩

色革職鞭一百折贖移臣免革職鞭五十折贖○壬子尙書宗室韓岱等入奏事 上以戶部諸臣給餉不均之罪俱係巴哈納所爲命削碩詹車克王國光兩箇前程贖身車克並免籍沒仍各留原任○設刑部獄司醫生一○定各直省鄉試差員例順天江南正副主考浙江江西福建湖廣正主考差翰林官八員浙江江西福建湖廣副主考山東正主考差給事中五員山東副主考山西正副主考河南陝西正主考差光祿寺少卿一員吏禮二部司官各二員河南陝西副主考四川廣東正副主考廣西雲南正主考差戶兵刑工四部司員各二員廣西雲南副主考貴州正副主考差行人二員中書評事各一員各衙門堂印官慎選開送如應差八員者倍送十六員禮部會試內院吏部擬定正陪奏請簡命其已充會試房考鄉試主考者不得重送順天府考聽吏禮二部選

用餘省聽各巡按御史選用闕定內簾○予故戶部右侍郎馮杰祭葬○贈陣亡厄布痕扎索爾官○癸丑定行軍例 上諭兵部曰凡領兵將帥務在綏輯地方安撫百姓嚴飭兵將恪遵紀律毋得肆行搶掠果能愛我良民得免禍難自有升賞儻故違軍法縱令兵將肆行搶掠不分善良妄指爲賊圖財肆戮必從重治罪○甲寅晉貝子屯齊爲貝勒○乙卯 上出安定門行獵幸沙河○丁巳 上次榆林召固山額眞公譚泰諭曰昨冷僧機引多爾博見朕及出冷僧機奏言兩旗大臣原誓立肅親王爲君睿王主立皇上今雖將多爾博破格寵顧何足以報又冷僧機請恩遇羅什後羅什奏云睿王以冷僧機爲諂達厚加寵遇陛下亦當眷顧爾譚泰可傳諭貝子錫翰此是何等言語朕實不能不加詳鞠隨下法司傳集貝子鞏阿岱錫翰固山額眞尙書譚泰內大臣席訥布

庫巴圖魯詹護軍統領鰲拜巴圖魯伊爾德議政大臣哈世屯巴哈侍衛坤巴圖魯等訊鞫據供我等立誓但云若換 朝廷宮殿瓦色變易旗幟我等卽死於此於是部議誓立肅王之事既涉子虛冷僧機以毫無影響之事獨行妄奏誣讎大臣命巴哈哈世屯賴他庫訊問時冷僧機又將誣奏大臣之言稱爲無有詐僞轉變不以實對又冷僧機哈世屯同至睿王所睿王偶言決拾敝壞冷僧機輒言奏 上卽製二枚送來乃不待 上賜私獻二枚自希

寵愛又冷僧機取 朝廷商人馮大格之白狼裘不以進 上乃

稱爲己有獻之睿王罪款炳著冷僧機應論死籍沒家產妻子入官得旨冷僧機理應處斬姑從寬免死爲民其家產止照披甲人例給與餘俱籍沒○辛酉 上次赤城○以王文奎爲兵部右侍

郎兼右副都御史總督漕運巡撫鳳陽

由內翰林弘文院學士遷

○甲子 上

次上都○平西王吳三桂奏請入覲許之○乙丑以恩格德爲禮

部侍郎

由理事官遷

○上以內三院大學士品級旣與尙書同遂命

學士品級與侍郎同每院添設侍讀學士三秩三品裁侍讀各二

○丙寅翁牛特部杜棱郡王等來朝○和碩鄭親王世子富爾敦

薨年十九諡愍厚○己巳 上次俄爾峒○故明崇禎妃尤氏卒

殯葬如禮仍撥給太監守墳○庚午巴林部固倫額駙郡王色布

騰等來朝○免朝鮮額貢黃柑柚石榴○命故靖南王耿仲明子

繼茂襲爵○辛未 上回鑾次上都河○壬申 上次俄爾峒河

○增偏沅撫標兵三千名合額設兵一千五百名分爲三營駐沅

州○丙子蒿齊忒部郡王博羅忒額爾德尼等來朝

五月丁丑朔 上次謨護里伊扎里河○江西巡撫夏一鶚奏逆

渠傅鼎銓等盤踞江閩恃險負固臣調兵分路夾擊追入福建陣

斬賊級萬餘生擒鼎銓及僞總兵楊起龍僞副將等一百八十三員獲贏馬器械僞札關防甚多得旨傳鼎銓等著正法○辛巳

上次庫爾奇勒河○壬午烏朱穆秦部塞校額爾德尼勒等來朝

○乙酉 上次西喇塔喇○調噶達渾爲戶部尙書馬光輝爲戶

部侍郎碩爾對爲刑部侍郎宜巴漢爲副都御史○以覺善爲左

都御史馬汝觀爲刑部右侍郎伊爾格德爲工部侍郎○壬辰

上次孫河○予殉難樂安縣知縣孟學遷官廕○以吳一元爲四

川按察使由浙江溫處道參政遷○癸巳 上還京師○丙申定諸王以下

坐褥制更定異姓公侯伯頂帶制○免江南英山縣五年至七年

逋賦○戊戌晉封輔國公韓岱爲鎮國公○庚子諭諸王公曰連

年苗畧粒食維艱今朕獵回見禾稼茂盛足覘有秋恐爾仍前放

鷹馳獵以致蹂躪田禾殊堪軫念今後必俟收穫之後方許放鷹

勿得玩違○巡漕御史張中元列款奏參總漕吳惟華貪婪誤漕
狀命革職嚴訊○定世子及福金頂帶坐褥儀仗制○復封敬謹
郡王尼堪端重郡王博洛爲和碩親王○甲辰外轉御史張煊列
吏部尙書陳名夏結黨行私銓選不公諸款訐於吏部並語涉洪
承疇陳之遴等下諸王部臣鞠議部議諸款多屬故前且有不實
煊向爲御史不言今言於外轉之後心懷妬忌誣讒大臣張煊應
論死名夏等免議從之

六月丙午朔 上幸南苑○陝西總督孟喬芳奏撫標中軍遊擊
陳明順等會同河南官兵擊破何柴山等賊於商州雒南縣柴山
遁餘黨盡殲○戊申設守興京 二祖陵章京二筆帖式二馬法
二兵每旗二名東京 二祖陵同○丁巳固山額眞阿喇善等奏
率師攻克山東盈河山等寨擒斬賊首劉遜張齊等二十一人餘

賊斬殺無算俘獲甚眾○建禁城土山白塔城○辛酉給事中魏象樞奏國家錢糧部臣掌出藩臣掌入入數不清故出數不明請自八年爲始各省布政使司於每歲中會計通省錢糧分別款項造冊呈送該督撫按查覈恭繕黃冊一卷撫臣會奏總數隨本進呈御覽仍造清冊咨送在京各該衙門互相查考既可杜藩臣之欺隱又可覈部臣之參差至於故明勦逆產價蘆鹽租課贓罰銀兩本折物料等項一概報明庶錢糧清國用足又言近奉諭停止城工盡免加派查照完過數目開除八年額賦但有司派征錢糧皆假吏胥里書之手或蒙蔽不知或通同作弊朝廷雖有浩蕩之恩而小民終未免剝削之苦請敕該督撫按速檄各州縣照本年易知單備造格眼清冊詳註某戶某人某項錢糧及蠲免開除徵收數目送督撫按覆覈無差卽將原冊鈐印發徵儻有改

冊徵收自立紅簿等弊立行糾參則 皇仁下逮不爲貪吏所蔽

命所司確議以聞○壬戌諭戶部太和山春秋二季貢符篆黃精等物實屬無用且長途轉運未免煩擾驛遞以後著永免辦解○乙亥定 諸陵 壇 廟祀典○丙寅歸化城土默特部甲喇章京那爾穆等來貢○庚午諭內三院朕洞知年來有司貪惡故於閏二月初九日曾諭吏部敕各督撫將所屬有司官嚴行分別等次立刻參奏不得姑留地方害民今已閱四五月矣未見遵旨實力舉行猶然瞻徇延捱毋乃負朕振刷之意乎見任督撫久者五年六年近亦三四年有司臧否貪廉早當見聞眞確何待今日始加考試總由督撫平日以賄賂派索爲事貪惡有司厭其欲而扼其吭者有之或八旗舊人在任者咆哮要挾督撫畏忌不敢彈劾者有之似此貪懦安能糾察宜乎盜賊未盡削而黎民無起色也今

復嚴諭凡貪惡及不識字縱信徭役劣員作速指參至於司道乃有司綱領尤宜察劾若再遲違定治重罪在內科道官旣任言責大而督撫按小而府州縣以及天下弊端凡有見聞卽行參奏勿懷私誣陷毋苟且塞責若夫仰人顏面拾人津唾旣幸免於議甯無愧於心至於欽差御史例得與督撫互糾已詳載都察院條奏內著實力遵行○辛未諭禮部順治元年定守明朝諸帝陵寢並祭典因神宗與我朝有嫌故裁之朕思前朝帝王陵寢理宜防護況我朝凡事俱從寬厚今神宗陵著照故明十二陵例以時致祭仍設太監陵戶看守卽著遵行○廣東巡撫李棲鳳彙報恢復廉州永安和平興甯長樂龍川惠來潮陽遵化揭陽晉甯程鄉澄海等縣○江西巡撫夏一鶚奏副將康時昇等破賊張自盛於封禁山○壬申禮部奏皇上敦明孝道倣古追尊祖宗大禮俱已

舉行 祖陵應照帝王陵從新修繕建立碑碣設官員並守陵
人戶仍定祭祀禮儀以彰孝思命速舉行○初以日月從祀天
壇裁春秋二分祀事至是禮部請照舊典於從祀天壇外仍於
春秋分日行朝 日夕 月禮又 萬壽聖節仍照例遣官致祭
東岳城隍眞武之神報可○贈建昌府殉難遊擊蔣國允官○癸
酉平南王尚可喜彙報收復雷廉潮惠等府○乙亥禮部請照例
加 四祖 太祖 太宗陵山封號從祀 地壇命作速舉行